

ASO LUA, 17 TESEMA 2019

Na tauaofia le Fono Aoaofa Faitulafono i le itula e 9:07 i le taeao e tusa ai ma le Polokalame o Fonotaga a le Palemene 2019/2020.

Tatalo.

FOFOGA FETALAI: Ou te faasilasila atu ua toe amatalia nei Taualumaga ma Galuega a le Fono Aoaofa Faitulafono.

E avea lenei avanoa ou te faatalofa atu ai ma le agaga faaaloalo i le paia o le Palemene i lau Afioga i le Taitai o le Maota, le Afioga i le Palemia ma le Sui Palemia faapea foi le Kapeneta aemaise o Taitaifono, o sui usufono mamalu o le Palemene ua mafai ona faaauuina le tatou Galuega i lenei aso, e pei ona tolopo mai ai i lena masina ua tuanai.

E faatalofa foi i Ofisa Sili o Pulega ma Pule Sili o Matagaluega ma Faalapotopotoga a le Malo aemaise foi o le faafofoga tapuai mai a le atunuu.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Faitulafono na te iloiloaina ai Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.1) 2019/2020.
2. Tulafono Tau Faaofi o Teuteuga o le Tulafono o le Pulega o Tupe a le Malo 2019.

17 TESEMA 2019**Faaaliga mai le Taitai o le Maota**

3. Tulafono Tau Faaofi o Teuteuga o le Tulafono o le Faafoega o Lafoga (Polokalame Faa-Eletoroni) 2019.

TUUINA ATU i lou nei Lima i lenei aso 16 o Tesema 2019.

(Sainia): Tuimalealiifano Vaaletoa Sualauvi II
O LE AO O LE MALO

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoao Faitulafono mo le iloiloaina o Tulafono Tau Faaofi ua faaaliga i inei:

1. Tulafono Tau Faaofi o le Vaega o Faatoaga ma Faiga Faiva 2019.
2. Tulafono Tau Faaofi o Teuteuga o le Tulafono o Fesootaiga 2019.
3. Tulafono Tau Faaofi o Teuteuga o le Tulafono o Malosiaga o Leoleo 2019.
4. Tulafono Tau Faaofi o Teuteuga Eseese (Komiti Faatino o Faalapotopotoga a le Malo) 2019.
5. Tulafono Tau Faaofi o Teuteuga o le Tulafono o Meatotino Tau le Atamai 2019.
6. Tulafono Tau Faaofi o Teuteuga o le Tulafono o Tamaiti (Nu.2) 2019.

TUUINA ATU i lenei aso 16 o Tesema i le tausaga 2019.

Hon TUILAEPA Dr. Sailele Malielegaoi
TAITAI O LE MAOTA.

17 TESEMA 2019**TUSI FAAMAONIA O LE TULAGA FAANATINATI**

E tusa ai ma le Tulafono Tumau 100(2), ua tuuina atu nei le Faaaliga i le Fono Aoao Faitulafono mo le iloiloaina o le Tulafono Tau Faaofi ua taua i lalo i lona **Tulaga Faanatinati.**

1. Tulafono Tau Faaofi o Teuteuga o le Tulafono o le Faafoega o Lafoga (Polokalame Faa-Eletoroni) 2019.
2. Tulafono Tau Faaofi o Teuteuga o le Tulafono o Fesootaiga 2019.
3. Tulafono Tau Faaofi o Teuteuga Eseese (Komiti Faatino o Faalapotopotoga a le Malo) 2019.
4. Tulafono Tau Faaofi o Teuteuga o le Tulafono o Meatotino Tau le Atamai 2019.
5. Tulafono Tau Faaofi o Teuteuga o le Tulafono o Tamaiti (Nu.2) 2019.

TUUNA ATU i leni aso 16 o Tesema i le tausaga 2019.

Hon TUILAEPA Dr. Sailele Malielegaoi

TAITAI O LE MAOTA.

SAUNOAGA O MALIU

Na faasilasila e le Fofoga Fetalai i le Palemene le tuumalo o nisi o tamalii sa avea ma sui usufono o le Palemene i Paeaiga ua mavae.

1. *O le **Afioga UNASA Mesi Galo**, o le sa avea ma sui usufono o le Palemene mo le Itumalo Faaalaalafaga o Faasaleleaga Nu.3, i le Paeaiga Lona XI, 1991-1996, Paeaiga Lona XIII, 2001-2006 ma le Paeaiga Lona XIV, 2006-2011.
Sa avea le Afioga ia UNASA Mesi Galo ma Minisita o Faamasinoga ma Pulega tau Faamasinoga i le Paeaiga o le 2006-2011.
O le Paeaiga 1991-1996 sa avea ai le Afioga ia UNASA Mesi Galo ma sui usufono o le Komiti o Tupe.*

17 TESEMA 2019

Saunoaga o Maliu

O le Paeaiga 2001-2006 sa avea ai le Afioga ia UNASA Mesi Galo ma Failautusi Faa-Palemene o le Matagaluega o Galuega, Felauaiga ma Atinae Eseese, Pulega o le Suavai, Faalapotopotoga o le Malosiaga Faa-Eletise, Taavale Afi ma Pulega o Vaa, Pulega o Malae Vaalele, faapea Malae Taalo ma Nofoga tau Taaloga a le Pasefika i Saute i le tausaga 2007.

E le gata i lea sa avea o ia ma sui usufono o le Komiti Filifilia o Mataupu tau Faamasinoga, Leoleo & Falepuipui ma Faamasinoga o Fanua ma Suafa. Sa avea foi ma Sui Taitaifono o le Komiti o Fefaatauaiga, Pisinisi ma Alamanuia.

2. *O le Afioga PATU Ativalu Togi II, o le sa avea ma sui usufono o le Palemene mo le Itumalo Faaalaalafaga o Vaimauga Sisifo i le Paeaiga Lona XIII 2001-2006.*

Sa avea le Afioga PATU Ativalu ma Sui Taitaifono o le Komiti filifilia a le Palemene o Faamasinoga, Leoleo & Falepuipui ma Fanua ma Suafa. O ia foi o se sui usufono o le Komiti o Tulaga Aloaia ma Amioga Taualoga.

Ia avea ia lenei avanoa e fai ai a'u ma sui o lenei Palemene mamalu e molimoli atu ai faamaisega ma faamafanafanaga i Itumalo, Afioga i faletua ma nofo a alo aemaise o Aiga ona o le valaau a le Atua i ia fo'i tamali'iua fai i lagi le folauga.

E avea foi lou leo e fai ma fofoga taumomoli o lenei Palemene i le Afioga i le Palemia, le Sui Palemia ma le Kapeneta e momoli atu ai foi faamaisega i le paia ma le mamalu o le atunuu, i matua ma aiga o lo o faapena ona mafatia ona o le toesea e ala i le maliu ma le oti o fanau ma i latou o e pele ona o le sauva o le faamai e pei ona tatou feagai ai i lenei vaitaimi, o le faamai lea o le Misela. Ia, o le Atua lava e faapena ona faamaise Lona Agaga ia i latou o lo o feagai ma faanoanoaga.

Avea ia lenei avanoa ou te valaau faaaloalo atu ai i le paia o le tatou Palemene ina ia tatou tutulai filemu mo se minute e tasi e faailoa ai lo tatou agaga faaaloalo e le gata i tatou sui usufono ua tuua le Malo, ae faapea foi i aiga ma matua o i latou ua faapena ona afaina lo latou soifua ona o le maemaea o le faamai e pei ona feagai ai ma lo tatou atunuu. Le paia o le Palemene tatou tutulai mo se minute e tasi.

Na tutulai filemu le Maota mo le minute e tasi e faaalua ai lo latou faaaloalo mo uso a sui usufono ua tuua le malo.

17 TESEMA 2019**TUUINA ATU O LIPOTI A KOMITI FAA-PALEMENE**

Na tolaulauina e le Failautusi Lipoti a Komiti Faa-Palemene ua faataatia i luga o le Laulau a Fono e tusa ai ma T.T.52(5).

1. P.P.2019/2020 Nu.114, Lipoti a le Komiti o le Vaega tau le Tamaoaiga i le P.P.2019/2020 No.69, Pepa a le Matagaluega o Pisinisi, Alamanuia ma Leipa mo le Palemene mo le Faamaoniga o Iloiloga o Feagaiga Faava o Malo i le Fono Aoaofaitulafono.
2. P.P.2019/2020 Nu.115, Lipoti a le Komiti o le Vaega tau le Tamaoaiga i le P.P.2019/2020 Nu.92, Lipoti Faaletausaga a le Matagaluega o le Va i Fafoma Fefaatauaiga mo le Tausaga faaletupe 2017/2018.
3. P.P.2019/2020 Nu.116, Lipoti a le Komiti o le Vaega o le Tamaoaiga i le P.P.2019/2020 Nu.93, P.P.2019/2020 Nu.94, P.P.2019/2020 Nu.95, P.P.2019/2020 Nu.96, & P.P.2019/2020 Nu.97, Lipoti Faaletausaga a le Faalapotopotoga o Tauimo Faalavelave Faafuasei mo le tausaga 2012, 2013, 2014, 2015 & 2016.
4. P.P.2019/2020 Nu.117, Lipoti a le Komiti o le Vaega o Atinae Eeseese i le P.P.2019/2020 Nu.2, Lipoti Faaletausaga a le Pulega o le Suavai 2017/2018.
5. P.P.2019/2020 Nu.118, Lipoti a le Komiti o le Vaega o Atinae Eeseese i le P.P.2019/2020 Nu.5, Lipoti Faaletausaga a le Faalapotopotoga o le Malosi Faaletise 2017/2018.
6. P.P.2019/2020 Nu.119, Lipoti a le Komiti o le Vaega o Atinae Eeseese i le P.P.2019/2020 Nu.13, Lipoti Faaletausaga a le Kamupani Vaa a Samoa 2017/2018.
7. P.P.2019/2020 Nu.120, Lipoti a le Komiti o le Vaega o Atinae Eeseese i le P.P.2019/2020 Nu.17, Lipoti Faaletausaga a le Pulega o Felauaiga i le Laueleele 30 Iuni 2018.
8. P.P.2019/2020 Nu.121, Lipoti a le Komiti o le Vaega o Atinae Eeseese i le P.P.2019/2020 Nu.18, Lipoti Faaletausaga a le Pulega o le Taulaga 2017/2018.
9. P.P.2019/2020 Nu.122, Lipoti a le Komiti o le Vaega o Atinae Eeseese i le P.P.2019/2020 Nu.20, Lipoti Faaletausaga a le Faalapotopotoga o Vaa a Samoa 2017/2018.

17 TESEMA 2019

**FAAMATALAGA FAA-MINISITA A LE PALEMIA MA LE
FAATAATIAINA O LE FAASILASILAGA O LE POLOAIGA
MO FAALAVELAVE TUTUPU FAAFUASEI**

Susuga Hon TUILAEPA AUJUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetala'i, faapea foi le mamalu o le Maota nei tainane le faafogafoga mai o Samoa i ona tulaga faalupe.

Ou te tulai atu i le agaga faaaloalo e tusa ai ma aiaiga o le mataupu 105 ma le 106 o le Faavae o le Malo Tutoatasi o Samoa, e faatatau lea i Poloaga o Faalavelave e Tutupu Faafuasei. O lo o aiaia ai le mafai e Le Ao o le Malo mai lea taimi i lea taimi ona faia ni Poloaga. E amata atu nei ona taua ia Poloaga o Poloaga o Faalavelave e tutupu faafuasei. E pei ona o le a ia silafia ua tata ai, e faafaigofieina ai le puipuia o le saogalemu o le soifua maloloina o tagata uma o lo tatou atunuu. Ua malama nei i ulugalua le faamoemoe o lo tatou Malo e pei ona faalauiloa faalauaitetele, i le amata faamamaluina o le Poloaga leni o Faalavelave Tutupu Faafuasei mai lava i le aso 15 o Novema o le 2019 o le tausaga leni. Ma o le a tumau lona faamamaluina mo se vaitaimi e 30 aso, ma toe iloiloina foi pe faaauau pe leai.

I le Fonotaga faapitoa a le Kapeneta na usua i le aso Lua o Tesema le aso 3 lea 2019, na talanoaina ma faamaonia ai le toe faia o teuteuga o aiaiga o le Poloaga e pei ona faamamaluina i le aso 15 o Novema 2019, e aofia ai vaega nei.

O le tapunia uma o Matagaluega ma Faalapotopotoga Tumaoti e aofia ai ma le Malo, Ofisa o auauanaga ma Pisinisi uma lava mo soo se auauanaga e masani ona tatalaina mo le mamalu lautele o le atunuu. E mai le itula e 7 i le taeao seia oo atu i le itula e 5 i le afiafi o le aso Tofi, aso 5 o Tesema, faapea foi ma le aso 6 o Tesema 2019, faatasi ai ma isi vaega faapoopo o leni lava Poloaga e pei ona fofoga i ai si o tatou atunuu i luga o le Televisi ma Leitio faasalalau ma isi foi auala eseese o faasalalau faaneionapo. O leni Poloaga e tusa ai ma aiaiga o le Faavae 106 le faavae lea o le Malo o Samoa, o le Malo Tutoatasi e pei ona talafeagai mo le saogalemu o tatou tagata lautele o Samoa. Na sainia lea Poloaga e Lana Afioga i le Sui o le Fono a Sui Tofia, le Afioga ia Le Mamea Lemalu Su'a Tuiletufuga Leatuvao Ropati i le aso Lua, 3 o Tesema 2019. E avea ai o ia ma sui o le afioga i Le Ao mamalu o lo tatou Malo sa toesea, ona o tulaga o siaki ua uma ona faatulagaina mo lona soifua maloloina faatasi ai ma lana Masiofo, i luga lava o le fautuaga a le Kapeneta.

17 TESEMA 2019**Faamatalaga Faa-Minisita a le Palemia ma le Faataatiaina o le Faasilasilaga o le Poloaiga mo Faalavelave Tutupu Faafuasei**

I le Fonotaga faapitoa a le Kapeneta na usua i le Aso Toonai, 14 Tesema 2019, sa talanoaina ma faamaonia ai e le Kapeneta le tuuina atu o le Poloaiga mo Faalavelave Tutupu Faafuasei, Orders for the State of Emergency i lalo o le Mataupu 105 ma le Mataupu 106 o le Faavae o le Malo Tutoatasi o Samoa e pei ona faaali atu e faapea.

1. O le toe faaauauina lea o Poloaiga mo Faalavelave Tutupu Faafuasei na muai tuuina atu i le aso 15 o Novema 2019 i lalo o le Mataupu 105 ma le 106 o le Faavae o le Malo Tutoatasi o Samoa, seia aulia le aso 29 o Tesema 2019.
2. Le tapu ona auai o le fanau laiti e oo atu i le 14 tausaga le matutua i soo se faatasiga, public gatherings, mafua lea ona o i latou lava ia e pito i lamatia le ola i le misela.
3. Le tapu ona malaga o soo se tasi o fanau laiti nei e oo atu i le 14 tausaga le matutua i le va o Upolu ma Savaii seia vagana ua faaaliga se faamaoniga ua maea ona fai le tui puipui o le misela.
4. O le toe faaauauina o suega mo na o i latou matutua mai le Vasega 13 agai i luga, e aofia ai suega a le Iunivesite Aoao o Samoa, afua atu i le aso 16 o Tesema 2019, le aso lea ananafi.

I le mulimulitaia o aiaiga o le mataupu 107 o le Faavae o Samoa, o lo o faapea mai ai, afai o lo o usua le Fono Aoao Faitulafono i le taimi lea ua fai ai se Poloaiga o Faalavelave Tutupu Faafuasei, e tusa ai ma aiaiga o le mataupu 106, o le a faataatia loa lena Poloaiga i luma o le Fono Aoao pe afai e usua le Fono Aoao i le taimi lea.

Lau Afioga i le Fofoga Fetalai, o le mafuaaga lea o lea ua faataatia ai, ona o lo o aiaia le aiaiga lenei i lalo o le Faavae, e tataua ona faataatia i le Fono lea pito lalata atu i le faasalalauga o le Poloaiga, ma o le mafuaaga lea ua ou tulai atu ai i lenei taeao, e faataatia i le Laulau a Fono a le Palemene lenei Poloaiga e pei ona faamamaluina i le aso 15 o Novema o lenei tausaga, seia oo atu i le aso 29 o Tesema o le tausaga nei lava e pei foi ona faailoa atu i le faaaliga faalauaitetele a lo tatou Malo i le taeao nei. Ua faataatia ai foi i le Laulau a Fono a le Palemene le Tulafono Tau Faaofi o Teuteuga o Tulafono o Tamaiti po o a tatou fanau laiti Nu 2 2019, o le faamalositia lea faale-tulafono o le faia o tui puipui mo a tatou fanau uma lava i Samoa, o se faiga lea ua manatu le Malo e mafai ai ona pue i latou, e oo mai nei latou te le o faatauina lava ia puipuiga a lo tatou Malo ma lo tatou atunuu.

*17 TESEMA 2019***Faamatalaga Faa-Minisita a le Palemia ma le Faataatiaina o le Faasilasilaga o le Poloaiga mo Faalavelave Tutupu Faafuasei**

I le feagai ai o lo tatou atunuu ma le faamai lenei o le misela, e momoli atu le faamalo i tapuaiga tatalo ma le tali mai a lo tatou atunuu i soo se auala e tatau ai. A o lo o alofaiva alii ma tamaitai fomai, faapea foi ma ilatou uma lava o tausii soifua i le togafitiga o lenei faamai ua aafia ai lo tatou atunuu, ma maumau ai soifua o nisi o fanau pele o lo o pito i aafia gofie ai. E momoli atu ai foi faamaisega i aiga faavauvau ona o le mafutaga ma e pele i loto ma agaga ua motusia faafuasei ae sa le i mafaufauina.

Lau Afioga i le Fofoga Fetalai, e pei ona faasalalau atu i le anoano o faasalalauaga lapatai a lo tatou Malo i televise ma leitio ma isi mau auala faasalalau, le faamai lenei o le misela e matuai faavaivaiina ai puipuiga masani faale-natura e faasagatau atu ai i soo se siama o faamai eseese immunity system. E aafia i isi aafiaga o totoga e pei o le tauaso ai, o le fefete ai o le faiai o le pepe se i tulou, o isi lava mai e fesootai e aafia ai ma le nimonia. O le tui lenei o le misela e tape ai siama o le misela, e pei ona silafia o le tui ua tatou faaogaina nei, e tolu mai na e iai i totonu o le tui. O le misela, o le lupela, o lona uiga o le misela lea ua faaigoaina nei o le German measles po o le misela Siamani, e aafia ai ma le mumps. O le tui misela faatulagaina i Samoa i le taimi o le malū, o le fai lea o le tui o le pepe i le 12 masina ma le isi i le 15 masina. Ae a oo loa la i taimi o le pepesi o le faamai ona tuu mai lea i luma i le 6 masina le tui muamua, ma le tui lona lua i le 11 po o le 12 foi masina, ona faatoa atoa ai lea o le puipuiga o le pepe. O lona uiga e tatau ona 2 tui o le pepe, i le tulaga masani o le 12 ma le 15 masina o le matua o le pepe po o le taimi lenei o le pipisi lea ua tuu mai i luma e pei ona ou taua, a o le i maua ni tui o ni misela, o lea faatoa maua i le 1963, 1964, 1965 seia tau mai i le taimi lenei. I faamaumauga ia e i ai e 2miliona le aofai o tagata i le lalolagi atoa, e feoti i tausaga taitasi. E 2miliona le aofai o tagata ae mafuli atu i le atu Europa.

O tatou uma lava o lo o i totonu o le Maota lenei, sa fananau i tua atu o le 1963, o lea lava tatou te nonofo malamalama, sa togafiti lava i tatou uma i nai fuefuesina, o launonu, o lautii, ma isi laulau e o tatou tagata fofu.

I faamaumauga o i ai, na pipisi le misela tele lava i Samoa i le 1891 i le faaiuga, i le agai mai i le masina o Ianuari i le 1893. Ma o ia foi faamaumauga o lo o faamaumau ai e le itiiti i lalo ifo o le 1,200 tagata na maliliu ai mai le faitau aofai o tagata o le atunuu i lona taimi e 34,500 tagata na i ai. A faapasene e 29% o le faitau aofai o tatou tagata na maliliu ai e sili atu lona matautia na i lo le flu lea na pisia ai tatou i le 1918 e laitiiti ifo lava i lalo pe a ma le 23% lea na feoti ai i le 1918 i le faamai tele lenei o le fulu Sepania.

17 TESEMA 2019**Faamatalaga Faa-Minisita a le Palemia ma le Faataatiaina o le Faasilasilaga o le Poloaiga mo Faalavelave Tutupu Faafuasei**

I le faasologa o Polokalame a le tatou falemai e faapea o le tausaga e 1980, e 376 latou na lipotia na mamai i le misela, i le 1985 e 1,095 le aofai o latou na mamai ai i le misela. I le tausaga e 1998 e na o le toa 8, i le 2010 e na o le toa 8 foi na lipotia na mamai i le misela, 2012 e toatasi, 2017 e na o le toa 3. E tau mai i le aso ananafi, e faapea e 5,267 le aofai o tagata o lo tatou atunuu ua mamai ai i le misela.

Na faasolo a tatou polokalame o tui i le 1998, 2003, 2008, 2009 ma le 2017. O lona uiga, o lo o faagasolo lava tatou polokalame nei mo tuiga a o le i oso mai le mea tele lea tatou te lavevea ai.

Ina ua tulai mai le faalavelave lau Afioga i le Fofoga Fetalai, lea na maliliu ai pepe e toa 2 i Savaii i le 2018, na faapafala tuiga mo sina vaitaimi, se i matua auiliili le mafuaaga tonu o le maliliu o fanau ia. Na i ai le masalosologa tele, atonu po o le vailaau e mafua mai ai. Ma o le faautautaga tatau e tatau ona faia. E tatau loa ona suesue muamua le vailaau, ona e oo mai i le taimi lea, o lo o tetee pea i laua na faia tui faatoa ioeina lava ina ua oo le mataupu i le Faamasinoga.

Lau Afioga i le Fofoga Fetalai, o le masina o Setema na faatoa tatou aafia ai, Novema faataoto loa ma le tatou faaiuga lea a le Malo o le Poloaiga lea ua mafua ai ona ou tutulai atu. O le masina o Setema, na faatoa aafia ai tatou i le faamai lenei, ina ua maua e tatou se lipoti mai Niu Sila e faataatau i le tamaitai lea na sau, ma atagia ai se tulaga o le mageso o le tino i inei. Na sau e auai i le fonotaga a le Metotisi sa usuia. Ia o lea la ua foi, ae o le tamaitai sa la fesootai ma feiloai pea, o le latou aiga, lea la na pisia ai, ma ave ai loa i le falemai ma o tatou mautinoa ai loa. I le fesootaiga mai Niu Sila a i latou o le Pulega o le Soifua Maloloina aemaise faamai pipisi, o lea na faatoa iloa ai e tatou, o lea ua aafia Samoa i le faamai pipisi lenei.

Na togafitia ai le tamaitai lea na pisia i inei ma tui ai lona toto ma ave e suesue mai i se laboratory o faamai pipisi i Ausetalia, ma o le masina o Oketopa na faatoa faamaonia ai loa o le faamai lenei o le misela lea ua aafia ai tatou.

Ma e silafia foi e lau Afioga o le masina o Novema na sosoo ai, i le Aso 15 lea na faatinoina ai loa le Poloaiga lea ou te tutulai atu e faalauiloa i totonu o le Maota lenei, ma le atunuu atoa.

Lau Afioga, sa ou taua i lau tautalaga i le vaega muamua, o tatou uma lava i totonu o le Maota lenei, atonu e leai lava se isi o tatou e le i tagofia e se fofo Samoa i tulaga o gasegase e masani ai tatou. Ma o tulaga na e tulai mai i tina e alofa i fanau, e naunau ina ia ola lana pepe.

O le ave e fofo, fofo le ila fofo le a, o lea faamai ma lea faamai ma le anoano o mau faamai Samoa o maua ai tatou.

*17 TESEMA 2019***Faamatalaga Faa-Minisita a le Palemia ma le Faataatiaina o le Faasilasilaga o le Poloaiga mo Faalavelave Tutupu Faafuasei**

Sa ou taua foi, ailoga e i ai se Samoa o i ai i Samoa nei e le i fofoina? E oo lava i fomai na fofo foi aua na ave faamalosi e o latou tina e vaai fofo Samoa. E oo foi ia te au lea ou te tautala atu, ua ou leiloa po o ua faafia ona ou agai i fofo e oo lava i le taimi lenei, ona e i ai lava gasegase e ave i le falemai, e toe iu mai lava i fofo Samoa.

E oo lava i le kanesa, lea ua inu le tele o vai Samoa e pei o le esi, sa faasalalau mai e isi foi ua toe lelei ai o latou gasegase o le kanesa. Faapena foi i le sasalapa. O vai ia e talenia ai tatou fofo, le autaulasea, ma o le ala foi lea na ala ai ona aumai e le Malo le Tulafono, ina ia aloaia uma i latou nei o taulasea o le atunuu ma e malamalama uma i ai tatou ae e le malamalama ai ia papalagi.

Lau Afioga i le Fofoga Fetalai, e le matua malamalama ai i latou i fafo i le mea lea e tupu i lo tatou atunuu. Ae taua tele faasalalaua a talausage, o faasalalaua faatupu manatu. O lo o faapea mai ai “e oo lava ia te i matou, e ave foi ia matou fanau ma matou o, e tui i le tui o le misela, ona faatoa o mai ai lea, fai loa fofo Samoa, aua e leiloa pe o filogia le misela ma ni isi foi gasegase e masani e pei o le ila.”

Lau Afioga i le Fofoga Fetalai, o le tulaga lena e le malamalama ai le lalolagi atoa, ae le tuua ai lo tatou pulunaunau, o tatou o Taitai o le atunuu lenei, ia tatou tutulai mai i taimi faigata faapenei, ma ave pea le fautuaga; muamua pea i Motootua, ae mulimuli i taulasea. Ma o le ala foi lea e oo mai i le taeao lenei e 28 le aofai o tatou maota, lea e faataunuu ai pea ia galuega faifaiepea lau Afioga i le Fofoga Fetalai a tamaitai ma alii fomai e tui fua ai le misela e leai se totogi.

O lea ua le faatali le Malo, ua leva ona faasalalau atu i lenei tausaga i ai latou e o mai, ao le luitau lea e feagai pea, o lea ua manatu ai le Kapeneta ma le Fono Faapitoa mo Faalavelave Faafuasei, o loa le Malo, tapuni ana galuega, ae o loa e molimoli vailaau ma tui i aiga. E o atu i isi aiga e taitoafitu tamaiti e le i tatuiina, ae o la e tutu mai taavale. E i ai foi ma isi, e nonofo lalata i le falemai, e faigofie ona savavali, ae le i faatinoina o latou tui, lea na o le tatou aufaigaluega faatino tui, aisea? ona e loloto le latou talitonuga i le malosia ma le paoa o le fofo Samoa.

Lau Afioga i le Fofoga Fetalai, o nei foi fofo, e mai i le Atua. E mulimuli mai fofo faapalagi ae na tatou ola ae lava ma fofo e tatou lava taulasea. A o lea foi, i talaaga o le Malo o Israelu, e i ai taimi e tofotofa ai e le Atua, po o mau pea ma mausali le faatuatua. E i ai le taimi e vaivai ai foi le faatuatua o le Malo o le Atua, ona Ia aumaia lea o uiga eseese e tofotofa ai lona nuu po o mau pea le faatuatua, a o lea ua faamalalama ma faamanino mai i le Feagaiga Fou, o le Faatuatua, e leai ni galuega, e lē aoga, matua leai lava ma se aoga.

*17 TESEMA 2019***Faamatalaga Faa-Minisita a le Palemia ma le Faataatiaina o le Faasilasilaga o le Poloaiga mo Faalavelave Tutupu Faafuasei**

O lona uiga, o lea ua tuu mai e le Atua le malamalama ia i tatou e tatou te iloa ai le mea e tatau ona fai. O auauna ia a le Atua o fomai, ua aumai i ai le taleni, aumai i ai le silafia, o le togafiti e tatau ona togafiti ai le misela. O ai la e toe faatalitali i ai? O ai e toe faatalitali i ai? O lea ua aumai le tui e tatau ona tatou o e fai.

E i ai le mea na tupu i le isi nuu, ua sau timuga, sau tafega, ona lolo ai lea o le nuu. Alu ae alu ae lava, tanumia le fogafale i luga, ona sau lea o le vaa faaola, i le auauna a le Atua o lo o nofo ai ma valaau i ai. Oso mai i luga o le vaa faaola, ae tali mai ia le auauna a le Atua, 'alu oe, ou te faatuatua pea i le Atua, e na te faaolaina au'. Ia ona sau lava lea o le timu, sau sau lava oo loa ina lofia le falealuga ma le tualuga, o le a le la e taupeupe ai lava le alii faifeau. Toe sau le vaa faaola, o le a le tali a le auauna a le Atua? 'Alu oe, ou te faatalitali pea i le Atua na te faaolaina au'. E le faimea tuulafoai le Atua." Ia ona timu ai lava lea, malemo loa ma le auauna a le Atua, alu atu loa i luga i le alii, ona fai atu loa lea," fai lava sina ou le fiafia ona ua ou fiu e tatalo mai. "Ae fetalai le Alii, "o ai e te toe faatali i ai? Na ou auina atu vaa faaola na e lua, ae e le talia'."

Lau Afioga i le Fofoga Fetalai, ia o lo o tele lava auauna a le Atua ave feau o lo o aumai, ae tele foi taimi tatou te nofononofo ai, leai se tatou galuega o fai, na o le faitio, faitio, faitio. O le faaaliga lea lau Afioga i lenei taeao fou, ma o le a toe logologo puialii foi lenei Maota aemaise lo tatou atunuu i se faaiuga a lo tatou Malo pe a aulia atu le aso e pei ona atofaina mo le faamamaluina o lenei Poloaiga i le faaiuga o lenei masina.

Soifua ma ia manuia le tatou Fono.

FOFOGA FETALAI: Malo faafetai. Ua faafofoga le Maota i le Saunoaga Faa-Minisita a le Afioga i le Palemia. Ma lou faaaloalo ou te tapa se lafo faatu mo le faataatiaina o le Saunoaga Faa-Minisita a le Afioga i le Palemia i le Laulau a Fono a le Palemene.

O lea ua uma ona tuuina atu le avanoa e faataatia ai le Faasilasilaga o Faalavelave Tutupu Faafuasei, a o se lafo mo le Saunoaga Faa-Minisita. Tulai mai lau Afioga i le Sui Palemia.

17 TESEMA 2019**LAFO MO LE FAATAATIAINA O LE FAAMATALAGA FAAMINISITA A LE PALEMIA I LUGA O LE LAULAU A FONO**

Afioga Hon FIAME NAOMI MATAAFA (Sui Palemia): Lau Afioga i le Fofoga Fetalai ou te tulai atu e faatu le lafo, *Ina ia faapea ona faataatia le Saunoaga Faa-Minisita a le Afioga i le Palemia i le tatou Laulau a Fono.*

Faaluaina e le Aiga Kapeneta.

Na faamaonia le lafo mo le faataatiaina o le Saunoaga Faa-Minisita a le Palemia i luga o le Laulau a Fono.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2019/2020 – faitauga muamua**

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2019/2020 i lona faitauga muamua.*

Faaluaina e le Minisita mo Aoga, Taaloga ma Aganuu ma le Minisita o Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.1) 2019/2020 i lona faitauga muamua.

**TALA FAATATAU MUAMUA O TUPE FAAOPOOPO 2019/2020
– faataatia i luga o le Laulau a Fono**

Na faataatia i luga o le Laulau a Fono e le Minisita o Tupe, Afioga Hon Sili Epa Tuioti le Tala Faatatau Muamua o Tupe Faaopoopo 2019/2020 e tusa ai ma Tulafono Tumau.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2019/2020 – lafo mo le faitauga faalua**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2019/2020 i lona faitauga faalua.*

17 TESEMA 2019

**Saunoaga o le Tala Faatatau Faaopoopo Muamua o le Tupe
2019/2020**

Faaluaina e le Minisita mo Aoga, Taaloga ma Aganuu.

**SAUNOAGA O LE TALA FAATATAU FAAOPOOPO
MUAMUA O LE TUPE 2019/2020**

Afioga Hon SILI EPA TUIOTI: Lau Afioga i le Fofoga Fetalai ma le mamalu o le Palemene:

E ia te au le ava ma le faaaloalo tele, e avea ai au ma Sui o le Malo, e tuuina atu ai i luma o le Laulaua Fono a le Palemene le Tala Faatatau Faaopoopo Muamua o le Tupe 2019/2020.

Lau Afioga i le Fofoga Fetalai, e tuuina atu leni Tala Faatatau Faaopoopo Muamua o le Tupe, a o ufitia Samoa i le ao pogisā o le faanoanoa ona o le faamai pipisi o le misela ua aafia ai le atunuu ma maumau ai le soifua o le fanau laiti. O le tulaga ua mautinoa nei, ua tatau ona toe iloilo totoa faiga faavae mo le malupuipua o le atunuu ina ia saogalemu Samoa mai nisi faamai ma mala e ono fotuai mai i le lumanai.

Lau Afioga i le Fofoga Fetalai, e muai faaleoina le agaga faafetai o le Malo i le alofa tulai ma le maau, e ala i meaalofa ma fesoasoani tau tupe ua agalelei mai ai le mamalu o Samoa i soo se tulimanu o le kelope, faapea atunuu ma Faalapotopotoga Faava o Malo eseese o loo faipaaga ma lo tatou Malo faapea le Malo e fesoasoani i taumafaiga uma e faasaoina ai le soifua o tatou tagata mai aafiaga ogaoga a le faama'i o le misela.

E le faagaloina fo'i le sao taua ma le tautua a le mamalu o le atunuu o loo galulue soosoo tauau ma le Komiti o loo nafa ma faalavelave tutupu faafuasei i taumafaiga e laveai ai le soifua o e ua aafia aemaise le faasafuaina atu o tui puipua mai le misela ina ia faasopolia uma ai le atunuu. Faafetai, faafetai tele lava. Ua nao Le Atua e na te tauina atu la outou tautua.

E ao pea ona ou faailoa atu mo le silafia e lau Afioga i le Fofoga Fetalai ma le mamalu o le Palemene nei aemaise Samoa o loo faafofoga mai le fesoasoani a lo tatou Malo, e \$6 miliona tala mai Vaegatupe Le Fuafuaina sa faamatuina atu i le Masina o Novema ina ua muai faailoa mai e le Komiti o Faalavelave Faafuasei le moomia vave o vaegatupe e faatino ai le galuega laveai mo le tatou atunuu. O loo faaauau pea i le taimi nei leni auunaga ina ia mautinoa le tafieseina o le misela mai o tatou laufanua.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

Lau Afioga i le Fofoga Fetalai, ou te fia taua foi le tumau pea o le faasiliga o tupe faaalu i tupe maua a le Malo poo le Budget Deficit i le 1.2% o le tamaoaiga. E ui ina siitia tupe faaalu e ala i lenei Tala Faatatau Faaopoopo muamua o le Tupe, e tausisia pea e le Malo ana faiga faavae ma fuafuaga tuutuu mamao mo se tamaoaiga malosi e ala i le mataituina lelei o ana polokalame faatino ina ia faia e tusa o le malosi faatulagaina o le tamaoaiga.

Ua savalia nei i le 2 masina talu ona aafia lo tatou atunuu i le faamai o le misela ma ua matauina foi le tulaga maaleale ua feagai nei ma le tamaoaiga o le atunuu faatasi ai ma nisi o faailoilo e ao ona tapena i ai lo tatou Malo ina ia vave faafoisia le malosi o le tamaoaiga i le tulaga sa i ai muamua. Ua maea faatinoina nei e le Malo se suesuega o le tulaga o le tamaoaiga po o le (preliminary Economic Impact Assessment) ma faamautuina ai le ono oo atu i le 1% o le tamaoaiga, poo le \$22 miliona tala le tau atoa poo aafiaga i vaega eseese o le tamaoaiga talu ai le faamai.

Lau Afioga i le Fofoga Fetalai, ua uma ona faamatuina atu i le lua vaiaso talu ai e le Faaputugatupe mo le Lumanai Manuia o Tagata, National Provident Fund le \$7.8 miliona tala e faatupeina ai le 1.1% o tupe faameaalofa (cash grant dividends) mo ana sui faisafaga. O lenei faamamaavega e le gata ina fesoasoani tele i le mamalu o le atunuu ae o se gaoioiga e moomia tele i lenei vaitau e toe faataavili ma unaia malosi ai le tamaoaiga. O le agaga foi lena o le Malo e ala i lenei Tala Faatatau Faaopoopo Muamua o le Tupe, o le faatino o lana pitolaau o le faaauauina o galuega ma atinae e lagolagosua ai i le tamaoaiga i le taimi e moomia ai.

E tele ni vaega taua ua ave iai le faamuamua a le Malo i le taimi nei e aofia ai le; faasaoina o le soifua o le mamalu o le atunuu ma le faamalosi o puipuiga mai faamai pipisi; taumafaiga e toe faalauiloa ai Samoa i Tagata Tafafao Maimoa mai Fafu; avanoa sikolasipi mo fanau aoga; faaleleia ma faamalosi Atinae tetele e tali atu i suiga o le tau; faapea le faaauauina o galuega sa faatupeina i lalo o le Tala Faatatau Autu o le Tupe mo le tausaga o lo o faagasolo nei.

Tala Faatatau Faaopoopo Muamua o le Tupe:**Lau Afioga i le Fofoga Fetalai,**

O se ootoga leni o vaega autu o leni Tala Faatatau Faaopoopo Muamua o le Tupe mo le tausaga faaletupe 2019/2020.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

O le aotelega o tupe alu faaopoopo ua mafai ona faatupeina i lalo o le **Tala Faaopoopo Muamua o le Tupe e tusa lea ma le \$23.6 miliona** ma ua mafai ona faatupeina mai vaega nei:

Muamua, Tupe Maua Faaopoopo e \$13,620,404

**1. Matagaluega mo Faalapotopotoga a le Malo: \$3,801,186
E \$3,801,186 le Tupe Tului mai Faasiliga o Tupe Maua a
Faalapotopotoga (Dividends)**

O lenei vaegatupe ua na o se vaega o le tupe atoa sa mauaina mai ina ua faamuta le feagaiga i le va o Samoa ma le kamupani vaalele o le Virgin Australia.

2. Matagaluega o Tupe: \$9,280,098

i. Tupe Maua mai i Taaloga a le Pasefika - \$5,628,695

E pei ona silafia ua maea Taaloga o le Pasefika ma ua mautu nei le totoe ai o se vaegatupe e \$5.6 miliona tala o tupe sa maua mai i Paaga po o (sponsorships) faatasi ai ma le totoigiina o apitaga ma mea taumafa a atunuu auai sa toe faaolaina mai i lo tatou Malo.;

**ii. Lafoga i luga o le Penisini, Tiso ma le karasini -
\$1,100,000**

E iai le faamoemoe o le a amata faamamaluina lenei lafoga e 2 sene i le lita i le Masina o Ianuari 2020 ma o le a fesoasoani tele lenei vaegatupe e faaleleia ma faamalositia ai atinae o auala, alavai, alasavali, ma alasima i totonu o le atunuu;

**iii. Tupe Maua mai i le Faatau Ese Atu o Pasi na foa'i
mai e le JICA i le Malo - \$1,844,897**

O lenei vaegatupe sa maua mai ina ua faataueseina atu taavale po o Pasi sa faameaalofa mai e le Malo o Iapani mo le Fonotaga o Atumotu Laiti po o le (SIDS) lea sa talimalo ai Samoa i le tausaga 2014. O aiaiga o lenei fesoasoani e faailoa atu e le Malo o Samoa se atinae e faaoga ai lenei vaegatupe ma o le Falepuipui fou i Tanumalala sa malilie autasi i ai Malo e lua e faaogaina ai lenei vaegatupe.

**iv. Foa'i Tupe mai i Paaga, Faalapotopotoga ma Tagata
Taitoatasi i le Malo mo galuega laveai i aafiaga o le
misela - \$706,506**

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

O nei vaegatupe, o foai sa mafai ona faamauiina i totonu o le tusitupe faapitoa na faavaeina mo le misela, e tusa ma faamaumauga i le Aso 11 o Tesema 2019. O nisi fesoasoani ua le mafai ona faalauiloa i le taimi nei ua iai le faamoemoe e toe faalauiloa i le Tala Faatatau Faaopoopo Lona Lua o le Tupe ia Iuni o le Tausaga Fou.

3. Matagaluega o Tiute ma Tupe Maua - \$539,120

Lafoga i luga o Oloa i le va o Matagaluega a le Malo ua faaopoopo ona o le siitia ai o galuega fa'atino e tusa o talosaga ua tuuina mai:

E \$539,120 lafoga o le a aoina mai i Matagaluega e tusa o talosaga ma galuega faaopoopo ua tuuina i totonu o lenei Tala Faatatau Faaopoopo Muamua o le Tupe.

**Lua, Tupe Faameaalofa faaopoopo mai i Paaga a le Malo mo
Atinae – Grant Receipts (\$9,338,813)****1. Faletupe o le Lalolagi – SAT\$8,820,000**

Tupe Faaagaaga mo Faalavelave Faafuasei;

Ua faamatuuina mai e le Faletupe o le Lalolagi se vaegatupe e tusa ma le \$3.5 miliona tala Amerika, poo le \$8.82 miliona tala Samoa e fesoasoani ai i le tatou Malo ina ia tali vave atu i aafiaga ona o faalavelave tutupu faafuasei aemaise gaioioiga moomia e toe faafoisia vave ai le tamaoaiga o le atunuu. O lenei fesoasoani ua faia e tusa o maliega ua maea sainia e lo tatou Malo ma le Faletupe o le Lalolagi ma o se faamanatu taua lea ina ia tatou tapenapena mamao mo soo se faalavelave e ono tulai mai i le lumanai.

**2. Faalapotopotoga eseese a Malo Aafaatasi o loo faatino a
latou Polokalame e tali ai i aafiaga o le Misela -
SAT\$518,813****Tolu, Toe Fetuunai o Tupe Alu - \$1,156,549****1. Matagaluega o Faamasinoga:**

Faatuina o le Ofisa o Fesoasoani Faaletulafono – Community Law Centre (-\$350,000):

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

Ua faamautu mai e le Matagaluega o Faamasinoga le lē mafai ai ona faatinoina vave le faamoemoe o le faatuina o le Ofisa o Fesoasoani Faaletulafono i totonu o lenei tausaga faaletupe ona o tapenaga moomia e lei mafai ona faataunuuina.

2. Matagaluega o Falepuipui:***Totogiina o se vaega o le konekarate lea sa taofia seia maea galuega – Retention (-\$806,549);***

Sa talosagaina ma taliaina le tuuina atu o lenei vaegatupe i le Matagaluega o Falepuipui i le Tala Faatatau Autu o Tupe mo le tausaga o lo o faagasolo nei. Ae peitai, sa toe fetuunai vave e le Matagaluega ma faaaogaina ana tupe faasao i le faaiuga o le tausaga na tea nei 2018/2019 e totogi ai galuega a konekarate ua maea faatino ma lē moomia ai lenei vaegatupe ina ua tatala ma amata faaaoga tupe ua faatatauina mo le tausaga nei.

Lau Afioga i le Fofoga Fetalai, o le a ou ototoina atu loa Tupe Alu Faaopoopo (e aofia ai ma lafoga) i lalo o lenei Tala Faatatau Faaopoopo Muamua o le Tupe:**Polokalame o Tupe Alu:****1. Matagaluega o Pisinisi, Alamanuia ma Leipa –\$64,055:*****Ofisa mo le Polokalame o Galuega Faavaitaimi i Ausetalia***

Ua faatuina nei i Ausetalia se Ofisa fou o le Malo e gafa ma le Polokalame o Galuega Faavaitaimi i totonu o Ausetalia. O lenei vaegatupe e fesoasoani i le Matagaluega i le tautuaina o lenei Ofisa aemaise o manaoga masani e aofia ai le faatotogaina o le Ofisa ma le totogi o le aufaigaluega.

2. Matagaluega o Faamasinoga - \$504,455:***i. Tapenaga mo le Ofisa Tutotonu Fou a le Matagaluega i Salelologa, Savaii - (\$92,000)***

Ua amata tapenaga a le Malo mo le faatuina o se Ofisa Fou a le Matagaluega o Faamasinoga i le Taulaga i Salelologa. O lenei vaegatupe e amata faatino ai vaega moomia mo lenei galuega tele ma ua iai le fuafuaga o le a faamatuina atu i le Tala Faatatau Autu o Tupe mo le Tausaga faaletupe fou 2020/2021 le tau atoa o lenei Atinae aua le tautuaina o le mamalu o le atunuu i le motu tele i Salafai.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020****ii. Fonotele mo Aia Tatau a le Fanau (\$300,000)**

O lenei fonotaga faavao Malo ua faamoemoe o le a usua ia Mati o le tausaga fou, ma o le talimalo ai o Samoa i lenei fonotaga o se avanoa taua e faalauiloa ai le lagolago a Samoa i le puipuia o aia tatau a le fanau aemaise o se uluai taimi lenei ua faatino ai lenei fonotaga i lo tatou itulagi.

**iii. Faatupeina o Faamasino fou o le Faamasinoga o
Fanua ma Suafa (\$112,455);**

Ua iai le faamoemoe a le Matagaluega ma le Malo e toe faaopoopoina Faamasino mo le tautuaina o le Faamasinoga o Fanua ma Suafa. O lenei fuafuaga ua talafeagai ona o le faatupulaia pea o mataupu ma galuega o loo feagai nei ma le Faamasinoga ma e moomia ai Faamasino ina ia vave ona faia faaiuga o mataupu ua oo atu i luma o le Faamasinoga.

3. Ofisa o le Fono Aoaofaitulafono - \$210,000***Pili o le Eletise mo le Maota Fono Fou***

E tatala aloaia le Maota Fono fou ia Mati o le tausaga nei, ua amata faaiuina tapenaga o le Tala Faatatau Autu o le Tupe mo le tausaga 2019/2020 ma e lei mafai ona faamautuina i lea taimi se vaegatupe talafeagai mo le pili o le eletise. I le taimi nei, o lea ua mafai ona faatulagaina le tau o le eletise e fua i fonotaga sa faatinoina i tua mai o Mati o le tausaga nei ma e \$210,000 se vaegatupe lea ua tuuina i totonu o le Tala Faatatau Faaopoopo ona e moomia mo lea faamoemoe.

4. Matagaluega o Falepuipui ma le Toe Fuataina - \$4,350,729:**i. Fale Apitaga mo le Afaigaluega (\$1,150,000)**

Ua maea fausiaina nei se vaega tele ma amata faaaogaina le Falepuipui fou i Tanumalala. Ua matauina foi i le taimi nei le moomia ai o se fale apitaga mo le afaigaluega ina ia faamama avega mo le toatele e mamao alaafaga o loo galulue tausavali mai ai i aso uma. O lenei foi atinae e mautinoa ai le maua pea o le afaigaluega faaopoopo e mafai ona fesoasoani i e o loo galulue i soo se taimi se taimi o le aso.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020****ii. Afaigaluega Faaopoopo mo le Matagaluega
(\$330,683)**

E 15 le afaigaluega faaopoopo o le a faatupeina i lenei Tala Faatatau Faaopoopo Muamua o le Tupe. Ua faailoa mai e le Matagaluega le toaitiiti o le afaigaluega o loo gafa ma le vaaia o le Falepuipui i Tanumalala ma e le gafatia ona faatino uma o latou tiute ona o le faatupulaia pea o le fuainumera o e ua faasalaina i le falepuipui.

iii. Pa mo le Fale Puipui i Tanumalala (\$1,300,000)

O lea vaegatupe faaopoopo ua faamoemoe e faamaeaina ai nisi o vaega o loo totoe o le pa o lo'o siomia ai le lotoa o le Falepuipui i Tanumalala. E aofia foi i lenei talosaga ia uaea talatala faapitoa e faamalosia ai le pa puipui ma taofia ai pagota mai le sosola ese.

**iv. Isi Galuega o loo Totoe e Faamaea ai le Fale Puipui
(\$1,351,446)**

E iai isi galuega o loo faaauauina pea sa le mafai ona faatupeina i le Tala Faatatau Autu o le Tupe o le Tausaga nei. E moomia se vaegatupe faaopoopo ina ia mautinoa ai le faamaeaina o nei galuega uma e aofia ai le auala e agai atu i le Falepuipui, Tane Vai, Afi Moli Eletise, faapea ma isi galuega. Ua iai le faamoemoe e le tatau ona toe iai nisi galuega mo Tanumalala i le Tausaga Faaletupe 2020/2021 ma ua tatau foi ma le taimi e pasia ai loa lenei vaegatupe i le Palemene, ua tatau loa ona faagasolo tapenaga ma ia mautinoa ua tatau ona tatou mulimuli i le tatou procurement process.

v. Aseta mo le faamamāina o le taulaga (\$34,500)

E pei ona silafia ua tele ina faaaoga i latou i le falepuipui mo le moaina o vao ma le faaleleia, e le gata i le taulaga ma malae o le Ofisa o le Fono faapea le Fale Faamasino, a ua faapena foi le tulaga o le faamama atu o le taulaga e amata atu i Mulinuu tau i Vaiala, afe ifo i Motootua, Malifa ma Vaimoso. O lona uiga o le tele o le galuega lea sa faia e le MNRE ma le Samoa Tourism Authority, masalo o le a i ai le taimi o le a amata ai ona toe toese mai tupe na ae tuusao mai e fesoasoani i le faatupeina ona o lea ua tele ina faatino e le Vaega a le Falepuipui le faamamaina, ma ua matauina foi le matagofie o le tatou taulaga talu ai lenei galuega.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

Ma e aoga foi a oo i le taimi e magalo ai o e fai ni latou pisinisi faapena. O loo faaauauina pea le galuega o le fa'amamaina o le Taulaga i Apia e pagota ma e moomia meafaigaluega e faatino ai leni faamoemoe i vaiaso ta'itasi.

vi. Alauni mo le aufaigaluega faaleoleo (\$138,600)

E pei ona outou silafia o le natura o leni galuega e moomia ai le aufaigaluega faaleoleo i taimi uma ina ia mautinoa le vaaia lelei o leni nofoaga aua le saogalemu o le atunuu i soo se taimi. O nei alauni faaleoleo ua faia e tusa o tuutuuga o lo o faia mo isi aufaigaluega a le Malo e ono moomia le galulue i totonu o le 24 itula o le aso i soo se taimi e moomia ai.

vii. Totogi mo se fomai a le falepuipui mo le ono masina le ono masina o lo o totoe o leni tausaga faaletupe (\$45,500)

O se tasi o luitau o loo feagai nei ma le Matagaluega o le auina atu lea o pagota i le falemai i soo se taimi e moomia ai lea auunaga. E le gata ina taugata ae moomia foi le aufaigaluega e faatinoina lea auunaga ma atili toagaogao ai le aufaigaluega e tiute i le Falepuipui i Tanumalala.

5. Matagaluega o Tiute ma Tupe Maua - \$211,706:**i. Aufaigaluega ma aseta moomia mo le Poloketi e mataituina Tupe maua ma lafoga totogi a pisinisi (\$86,706)**

E taua tele leni poloketi e le gata ina faamalosia ai le usitaia o tulafono tau lafoga ma siitia ai tupe maua a le Malo mo ana atinae, ae mautinoa ai le taofia o gaiouga faasolitulafono o loo faia pea e nisi pisinisi o loo aoina le lafoga ae le faailoa ma totogiina mai i le Malo. O le vaegatupe faaopoopo o loo talosagaina e totogi ai le aufaigaluega ma aseta moomia mo le faatinoina o leni galuega.

ii. Masini e pueina ai faamaumauga o faatauga (\$10,000)

O leni masini e moomia tele e fesootai ai masini a le Matagaluega ma faamaumauga o loo pueina mai i pisinisi taitasi.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020****iii. Afi Eletise Faaleoleo (\$115,000)**

E moomia le afi eletise faaleoleo ina ia mautinoa ai le lē motusia o lenei auaunaga i taimi uma pe a amata faaaogaina loa lenei tekonolosi aua le mataituina o lafoga e totogiina mai e pisinisi i le Malo.

6. Ofisa mo Fuainumera Faamauina - \$829,988:**i. Faitau Aofai o Atinae Tau Faatoaga (\$763,788)**

O le faitauaofai o atinae tau faatoaga o loo fesoasoani mai ai le Faalapotopotoga o le FAO ma ua talosagaina se fesoasoani a le Malo e faatupe nisi vaega e le o mafai ona faatupeina i lalo o lenei fesoasoani. O lenei galuega e lua tausaga e faatautaia ai ma e tai 10 tausaga ma faatinoina. O le taua foi o lenei galuega e mafai ai ona maua faamaumauga e mafai ai ona fesoasoani i le fuafuaina ma le faatinoina o a tatou investment i totonu o le Matagaluega o Faatoaga.

**ii. Suesuega o Tupe Maua ma Tupe Faaalu o Aiga
(\$66,200)**

Ua faailoa mai le tuutiitia o fesoasoani mai paaga e aofia ai le Faalapotopotoga o le SPC mo lenei suesuega ma ua moomia ai se vaegatupe aua le tuufaatasia, lolomiina, aemaise o le faalauiloaina o lenei suesuega ma ana faamaumauga i le atunuu.

7. Matagaluega o le Soifua Maloloina - \$3,933,000:**i. Tupe Faaopoopo mo Totogi a le Aufaigaluega
(\$3,600,000)**

O lenei vaegatupe faaopoopo o le a faamatuina atu e totogi ai ovataimi a le aufaigaluega. O se auaunaga o loo ave iai le faamuamua a le Malo i taimi uma ma e le taofia foi le faasafuaina atu o le tautua a le Malo i le atunuu i le tulaga tau soifua maloloina. Ua nofo sauni foi lo tatou Malo e siitia le aofai o le aufaigaluega faapea isi vaegatupe talafeagai mo le faamalieina o lenei auaunaga taua tele mo le atunuu.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020****ii. Vaega e Vaavaaia le Fale mo Vailaau a le Falema'i
(\$48,000)**

Ua tapena nei le Matagaluega mo le faavaeina o se vaega faapitoa e mataituina ma vaavaia le fale tele o lo o teu malu ai tatou vailaau i le falemai. O lenei vaegatupe faaopoopo o le a totogi ai le faaululuga fou o lenei vaega faatasi ai ma vaegatupe moomia e faatotogaina ai le Ofisa.

**iii. Aitalafu Tuua a le Falemai i le Faalapotopotoga o
Tau mo Faalavelave Tutupu Faafuasei - (\$285,000)**

E iai aitalafu tuua a le Matagaluega i le Faalapotopotoga o le ACC mai le tausaga 2017/2018 e le i totogiina lava e tusa o aiaiga faaletulafono mo tagata faigaluega uma a le Malo. Lona uiga e foliga mai e le i totogia le ACC. Ua tuuina atu lenei vaegatupe e \$285,000 e faamaeaina ai lenei aitalafu ma avea o se faamanatu i le Pulega e aua nei toe tulai mai lenei mataupu i le lumanai.

8. Matagaluega o Tupe - \$10,743,251:**i. Sikolasipi mo le fanau aoga i le Iunivesite Aoao o
Samoa - (\$250,000)**

Atonu o lo o manatua e lau Afioga i le Fofoga Fetalai ma le mamalu o le Maota i le Lauga o le Tala Autu o le Tupe lea sa faaalua ai le tulaga e tataua ona fesoasoani ia i latou o lo o aoga ma lelei aoga i totonu o le NUS, ia faaopoopo ai le vaegatupe lea ia maua le avanoa e mafai ona o ai latou e sikolasipi, e foi mai tele lo latou sao i le tatou Malo ma lona tamaoiga, aemaise aiga. O lo'o ave pea le faamuamua a le Malo i le tulaga tau Aoaoga faapea le Soifua maloloina o le atunu'u. O loo faaauau foi i le taimi nei le polokalame e faaaoga fua ai le fanau mai le vasega laiti e oo atu i Kolisi mauululuga. Mo le Iunivesite Aoao o Samoa, o lea ua iai le finagalo o le Malo e tuuina atu avanoa sikolasipi i lona tau aofai e \$250,000 mo le tausaga o loo faagasolo nei ma e mataituina lelei e le Malo lona faaogaina e tusa o tuutuuga ua tapenaina nei.

**ii. Paleni o tupe e totogina atu ile Faalapotopotoga o
Auaunaga o Vaa a Samoa mo le Faatauina o le vaa a
le Forum Samoa - (\$357,458)**

O lenei vaegatupe e faamaea ai le paleni o le aitalafu o le sao o le Malo i le faataueseina atu o le vaa o le MV Forum Samoa II.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

O leni tuutuuga sa amata faatinoina mai i le tausaga 2016/2017 ae peitai o le feeseeseaiga o faamaumauga a le Malo ma le Kamupani o le SSS ua le faatatauina ai se vaegatupe mo lea faamoemoe i le Tala Faatatau Autu o Tupe o lo mo faagasolo nei.

**iii. Masini ma Polokalame Tekonolosi mo le Faamauina o
Lafoga i luga o Oloa - (\$1,393,286)**

Sa ou taua muamua leni poloketi tele e pei ona iai le fuafuaga a le Malo e faatino e le Matagaluega o Tiute ma Tupe Maua i le tausaga o loo faagasolo nei. E \$1 miliona tala sa faatatauina i le Tala Autu o le Tupe o le tausaga nei, ae peitai ina ua faailoa mai tau a kamupani o loo gaosia nei masini ma tekonolosi, e \$2.393 miliona tala lona tau atoa. O lona uiga e toe moomia leisi \$1.393 miliona tala e faamaea ai leni faamoemoe ma o le ala lea o leni talosaga mo se tupe faaopoopo.

**iv. Tupe Faatatauina mo Faalavelave Tutupu Faafuasei –
Disaster and Emergency Facility (\$8,462,507)**

O leni vaegatupe ua faamatuuina atu e fesoasoani i le Malo ao feagai ai le Komiti o Faalavelave Tutupu Faafuasei ma galuega laveai mai le faamai o le misela. E pei ona silafia, ua silia nei ma le lua masina talu ona faatino galuega a leni Komiti ma e tele se vaegatupe e totogiina ai le tau atoa o leni faamoemoe (emergency operation costs) e aofia tau o vailaau; meafaigaluega ma aseta mo le faatotogaina o falemai ma nofoaga o loo faaaogaina i le taimi nei; aufaigaluega ma le tau o taavale mo le tui puipuia o le misela; faalauiloa; aemaise galuega o loo faaauau nei e tafieseina ai le misela. Ua nofo sauni foi le Malo e toe faatulaga leni Polokalame taua o le Tui Puipuia a le Fanau ma e tele se vaegatupe e toe moomia aua lona faaauauina i le lumanai.

**v. Polokalame mo le faaigoaina ma le faatuatusiina o
auala ma fale i totonu o le atunuu - (\$30,000)**

O loo faagasolo i le taimi nei leni poloketi e pei ona tofiaina ai e le Kapeneta se Komiti Faapitoa i a Iuni o le Tausaga nei. Ua iai le faamoemoe e tataua ona faaigoa muamua le talafatai o Apia i le amataga o le Tausaga fou ma e moomia se vaegatupe e amata lolomiina ai numera o fale faapea le toe faaigoaina o auala ua leilolua ma faaleagaina faailoilo sa iai muamua.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020****vi. Polokalame e Toe Faalauiloaina ai Samoa ma lona
Atinae Turisi i Atunuu Mamao - (\$250,000)**

O le faamoemoe a le Pulega o Tagata Tafafao Maimoa mai Fafao i le taimi nei, o le faalauiloaina lea o Samoa o se atunuu o lo'o tatala pea mo malo asiasi mai atunuu mamao. E taua leni faalauiloa ina ia vave ona toe faafoisia le atinae o turisi i se tulaga malosi ma lagolago ai i le tamaoaiga o le atunuu. O leni vaegatupe e \$250,000 o le a galulue ai le Matagaluega o Tupe ma le Ofisa o Turisi i se tapenaga talafeagai e faalauiloaina ai Samoa i ana Maketi ma paaga i atunuu mamao.

9. Matagaluega o Leoleo - \$158,073:***Aoga Faapitoa mo Leoleo***

Ua amata faatinoina nei le faamoemoe o le Malo ma le Matagaluega i le fausiaina o se Aoga Faapitoa mo Leoleo i Tafaigata. O leni atinae o loo faatupeina e le Malo o Saina ae moomia i lalo o aiaiga o leni poloketi, le faafaigaluegaina e le Malo o Samoa o se vaega faapitoa e nafa ma le mataituina o leni atinae. O le vaegatupe lea ua tuu atu ua i ai i latou ua uma ona tofia e faatinoina leni galuega.

10. Matagaluega o Faalapotopotoga a le Malo - \$38,696:***Siitia o le Ofisa a le Matagaluega***

Ua iai le faamoemoe o le a siitia le Matagaluega mo Faalapotopotoga a le Malo mai lona nofoaga autu i le Faletupe Tutotonu o Samoa, i le NPF Plaza i le amataga o le tausaga fou. Ua faia leni fuafuaga ona o le moomia ai o se nofoaga e mafai ona faamalieina ai manaoga uma a le Matagaluega ona o le siitia o le toatele o le afaigaluega aemaise o le faatupulaia ai o tiute tauave ma e moomia ai se ofisa e mafai ona faatinoina ai leni auunaga i se tulaga mauualuga.

11. Pulega o Tagata Tafafao Maimoa mai Fafao - \$253,000:***Atinae o Togalaau mo maimoaga a Turisi – Atele***

O se tasi o luitau o loo feagai nei ma le atinae o tagata tafafao maimoa mai fafao, o le sailia lea o ni mataaga fou e faafiafiaina ai turisi ina ia umi ona nonofo i Samoa nei ma faaluina ai a latou seleni e fesoasoani ai i le tamaoaiga.

17 TESEMA 2019**Saunoaga o le Tala Faatatau Faaopoopo Muamua o le Tupe
2019/2020**

O lenei atinae i Atele o se tasi o fuafuaga mamao e faalauiloa ai laau ma fualaaauaina o loo maua i totonu o le atunuu ma maua foi le avanoa e maimoaina ai lenei mataaga e turisi o loo faatauaina nei ituaiga atinae.

12. Pulega o Felauaiga ile Laueleele - \$2,300,000:***Faaleleia o Alavai ma Auala Savali i Taufusi – Vaea Street***

O se vaega lenei o le Taulaga i Apia e matauina pea le lolovaia i le vaitau o timuga ma faaleagaina ai le tele o meatotino o aiga faapea pisinisi o loo iai i lea vaega o le atunuu. O le vaegatupe ua faamatuuina atu o le a fausiaina ai alavai fou ma auala savali ina ia saogalemu lenei vaega o le taulaga pe a oo i taimi o afa ma le mamafa o timuga. E faatauaina foi le maua o lenei avanoa e siitia ai le fausaga ma le malosi o galuega tetele nei ina ia mafai ona faatautee atu i suiga o le tau ma umi lona aoga. Ia atonu foi a maea lenei galuega, ia o se vaaiga sili foi lea ona manaia o lenei auala. E pei ua tatou masani ai lava i vaivai i autafa ma le palapala, atonu a maea ona faatino lenei galuega ua faapena foi ona siitia le matagofie o lenei auala lelei mo tatou.

**Polokalame/Poloketi Faatupeina mai Tupe Faameaalofa mai Paaga
a le Malo (\$518,813):**

- 13. Faalapotopotoga o le Soifua Maloloina o le Lalolagi (WHO) –(\$300,000)**
- 14. Faalapotopotoga mo Atinae a le Malo Aufaatasi (UNDP) - (\$106,213)**
- 15. Faalapotopotoga a le Malo Aufaatasi (RCCO) - (\$52,600)**
- 16. Faalapotopotoga o Malo Aufaatasi UNFPA - (\$60,000)**

E pei ona taua e momoli le tatou faamalo ma le faafetai i a tatou paaga i le fesoasoani mai, e le gata ia i latou, ae faapea foi le tupe tele mai le World Bank, aemaise foi o le paia ma le mamalu o le tatou atunuu, e le gata i pisinisi ma Ekalesia ma aiga i totonu nei ae faapea foi nisi o tatou aiga ma uo mai atunuu mamao na malaga mai ma fesoasoani i le faamoemoe. O lo o ua i ai pepa ia masalo ua tufa mai o lo o faamatala uma ma lisi mai ai i latou ua fesoaoani mai i tupe, o a uma mea pei ona ou taua muamua, o le aso 11 o Tesema lea na faagata ai le lisi lea ua aumai. A o nisi o alofa ua taunuu mai a ua pasi le aso 11, o le a tuuina mai i le Tala Faatatau Faaopoopo Lona Lua i le tausaga fou.

17 TESEMA 2019**Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga muamua****Upu Faaiu:**

Lau Afioga i le Fofoga Fetalai ma le Mamalu o le Fono, o lenei Tala Faatatau Faaopoopo Muamua o le Tupe sa tuufaatasia ma le naunautaiga e mafai ona faatupe vaega uma o loo ave iai le faamuamua a le Malo ma mautinoa o le a faamausaliina ai se tamaoaiga e gafataulimaina lona malosia aua le soifua manuia o tagatanuu uma o Samoa.

Lau Afioga i le Fofoga Fetalai, faapea Sui Usufono o le Palemene, avea au e fai ma Sui o le Malo, emomoli atu ai alofaaga ma faamanuiaga i lau Afioga i le Fofoga Fetalai, faapea foi le mamalu o sui usufono o le Palemene nei aemaise le tapuaiga a Samoa, ina ia maua se Kerisimasi fiafia ma se Tausaga fou manuia.

Soifua.

FOFOGA FETALAI: E le faigofie le galuega, malo faafetai.

E tusa ai ma Tulafono Tumau 133 o le a tolopo felafolafoaiga i le Tulafono Tau Faaofi o le Tala Faatatau o le Tupe Faaopoopo (Nu 1) 2019/2020 e le ititiiti ifo i le 14 aso, a o tuuina atu le Tala Faatatau Nu 1 o Tupe Faaopoopo 2019/2020, mo le iloiloga e le Komiti o Tupe Maua ma Tupe Totogi ma toe lipoti mai i le Fono Aoao i le Fonotaga o lumanai.

**TULAFONO TAU FAAOFI O LE TEUTEUGA O LE
TULAFONO O TAMAITI (NU 2) 2019– faitauga muamua**

FOFOGA FETALAI: Ou te tapa lau Afioga i le Palemia.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tamaiti (Nu 2) 2019 i lona faitauga muamua.*

Faaluainae le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o le Teuteuga o le Tulafono o Tamaiti (Nu 2) 2019 i lona faitauga muamua.

17 TESEMA 2019

**TULAFONO TAU FAAOFI O LE TEUTEUGA O LE
TULAFONO O TAMAITI (NU 2) 2019 – faitauga faalua**

FOFOGA FETALAI: Talu ai ua maea na sainia le tusi faamaonia o le tulaga faanatinati i le Tulafono lenei, o lea o le a sagai atu loa i le faitauga faalua seia oo ina ua faitau faatolu. Lau Afioga i le Palemia ou te tapa ma le faaaloalo.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tamaiti (Nu 2) 2019, i lona faitauga faalua ma ou te fia tautala faamalamalama i ai.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Pisinisi, Alamanuia ma Leipa.

FOFOGA FETALAI: Ou te tapa lau Afioga i le Palemia mo lau saunoaga faamalamalama.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, o le Tulafono lenei ua manatu le tatou Malo, e tatau ona aumai i totonu o le Maota ma faamaonia i se tulaga faanatinati ona o le matautia foi o lenei faamai ma le tulaga o lo o i ai lo tatou atunuu, e pei e le mamafa i ni isi o tina le tui o le misela ona o le tatou aga masani lava lea e ave i fofo, ua manatu ai le Malo, ua tatau ona fai loa se Tulafono ina ia tape ai le faamai lea, aua tatou te agai pea i luma ma fananau mai pea ia fanau a le atunuu i tausaga uma.

Ma o i la e pue ai latou ia o lo o totoe ma latou o le a soifua mai i le lumanai, o le faamallosia loa o le tui i totonu o aoga, e pei foi ona silafia e ono i ai lava le tetee pe ono i ai foi le faatamala, ae e le mafai lava ona faatamala matua i le faaaoogaina o fanau. O le tulaga lea e faataua e matua, e le gata la o tina, ae faapena foi i tama.

Ma o le tiute lava ia o le tuiga o fanau, e tuu lava i le tina, e le ano lava i ai ia tama, ae masalo o le taimi lenei ua vevesi ai tatou i le faamai o le misela, masalo faatoa malamalama lea o tama po o tama uma o Samoa, i le mea e pisi ai nei ia tina. O le alu e tui ia le lupela, tui le misela, tui le tui o le mami aua ua taoto tolu nei tui ia, ia e na o le tau lava o le tui puipui, tui puipui, ae o le tele lava o tatou tama e le malamalama i mea ia e pisi vale ai ia le tina.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ia ma o le tulaga la lena, e ono i ai foi le faatamala i tama, aua o aga lava ia e masani ai tatou e pei o le galuega lea e lafo lava i tina, e faitalia latou ma vaai ia nai pepe e fananau mai, faatoa gauai atu lava le tama pe a mai.

O lea la ua i ai le taua foi o le faamai lenei ua fagufagu mai ai i le Kapeneta, e aumai se Tulafono faapenei, ina ia faamalasia ai le tui o fanau laiti. Aua po o le a lava le maualuga o le tulaga lea ua i ai nei pe a ma le 92%, ae o pasene ia e totoe, pe a ma le 16,000 i le 20,000 le aofai o tagata ia e le i faia tui lea e i totonu o le pasene lea. E le laitiiti la e toatele, lea la lau Afioga i le Fofoga Fetalai, o le matua toatele lava i se atunuu e laitiiti. Ma e tatau la ona amata mea ai tatou i le Malo ma totonu o le Palemene lenei, tatou te faataoto se taiala, e mafai ai ona faamalasia loa ia tui o fanau.

O lea e tatou te talanoa i tui ia i le taimi nei. Pe oo nei i le Aso 29 o Tesema ona uma loa lea, ae a faapefea mai la ia pepe o le a fananau mai? I tua atu o le Aso 29? Ma e le o taofia le mea lea o le faipepe. O lea lava e faipepe lava tatou, o isi ua le gata i taitoalua ae o isi mea i tua atu. O le tulaga la lena e matua faataua ai, le Tulafono lenei, ina ia aua ne i tuufauina. O le tulaga foi e i ai foi isi tapuaiga, e faasa ona tatui fanau. E le afaina la pe ana faapea e nofonofo ai lava na o latou i le mea la e i ai, aua la ne i o i aoga. Ae a o loa la i le aoga, ona aafia loa lea o isi la e fananau mai a e le i tuina, ma ave i le aoga pe a leai se Tulafono.

O le ala lena e taua tele ai le Tulafono lenei, ou te faaigoaina le Tulafono lenei o le Tulafono o le Alofa. O le Tulafono o le Alofa lau Afioga i le Fofoga Fetalai, ina ia faasaoina fanau e le i tuina i le taimi lenei ona o matua ma o latou talitonuga, ma tamaiti o le a soifua mai i le lumanai. O le a caught uma ai i i, pue ai i totonu i i, ma e le o na ma le laina foi lau Afioga i le Fofoga Fetalai, o lea ua tautaua nei Samoa i le mea lenei i le faamai. Ua atili tautaua ai lava, ina ua matua tapunia uma galuega ae fai le tatou tuiga lautele. E se a se a se atunuu o le lalolagi ona faia se mea faapenei, ae o le faailoga lena lau Afioga o le faataua e le Malo o le soifua o le atunuu lenei, aemaise le soifua o fanau e pele i loto ma agaga. O lea lava e gagana ai failauga, ‘o au o matua fanau’.

O le isi lea auala e faatino ai le tulaga o le au o matua fanau, e tatau loa ona tui. Ma o lea foi ua ave nei ma luitau i le tele o atunuu, e ono alu atu loa le Samoa malaga atu i fafo, matua tilotilo lelei i le mea lea, e ono oo lava ina taofia ai le faimalaga atu i fafo.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

O le Aso Toonai talu ai na matua taofia ai e Amerika Samoa ni isi foi e o atu i Amerika Samoa ona talu ai ona o lo o faamalosia foi ia puipuiga. Pe tau atu o lea e i ai lau pepa o le tui, ae e ono le talitonuina aua o lo o i ai lava mea e tutupu, o le fai pepelo o pepa faamaonia ua uma le tui, ma ua le mafai lava masalo e oo mai lava i le taimi lenei e le o toe mafai ona toe malaga se isi i Tutuila seiloga lava ua matua talitonu le Malo o Tutuila, ua matua leai se tagata o totoe. E faamalo foi i le Taitai o le Faigamalo a Tutuila ua taunuu i lea tulaga, ona o lo o faataua ia te ia ma le Faigamalo, le saogalemu o tagata o Tutuila, ina ia matua puipuia malu ona e le o galo ia Amerika Samoa ona e na o tatou na mamai ma feoti ai, ae leai lava ma se Amerika Samoa na mai ai ona o le faamautuina o le matua sa taputapu ona toe malaga atu se isi i Tutuila mai iinei ma isi foi atunuu. O lona uiga o lo o mulimuli lava Amerika Samoa i latou tu ma aga masani, o faalavelave na tutupu i le tuanai.

O lea foi la, o se lapataiga lea mo tatou tagata, e fai tou tui, e le ma iloa pe avatu se isi au talosaga i se oti i Niu Sila po o Ausetalia ae matua **drill** lava oe, faatoa aumai ai sou pemitā e te alu. Ma ou te lagona foi e faatupu manatu i le mea lea ua tupu i lo tatou atunuu, i ni isi foi Malo o le a faimalaga atu i ai tatou i le fai foi o Tulafono e puipuia ai. O lea ua tatou amata mea atu i tamaiti, a malu ai lava i i, ua malu foi i o tatou tagata e matutua ae faimalaga atu i fafo, a o lea ua mausali le tatou Tulafono, ma e fesili foi tagata, o le a le Palemene na fai ai le Tulafono lenei? ona tau atu lea o le Paeaiga lenei, o le Paeaiga e i ai le tofamamao ma le faautautaga oo, i le faia o Tulafono e puipuia ai lo tatou atunuu, ma tupulaga mo nei iēluā.

O le tali atu la lea i le tulaga foi o lenei faamai, lea ua fai ai le Tulafono lenei, e tuu mai i o tatou luma tatou te soalaupuleina. Ma a silasila i le Tulafono, o le Tulafono o lo o teuteu ai ia taga i le Tulafono o le tele o Matagaluega o Matagaluega o Aoga, aafia ai le Tulafono o Nuu, Tulafono o Mataupu tau Lotoifale, o Teuteuga o Tulafono Tau Aoga, o Tulafono e Tau i le Lotoifale ia faapea foi ma Tulafono e Tau i Mataupu Tau Tina, ina ia tuu ai i totonu o vaega uma lava, o lo o aafia ai tamaiti, ia a tatou fanau.

O lea ua tasui uma lava Tulafono e le gata o le Tulafono Autu, a o Tulafono foi e soosoo tauau, e aafia ai mea tau fanau laiti. Lau Afioga o le faapuupuuga lena, e tumau lava ma faatinoina le tulaga o le manulauti ua tupu ae i totonu o le tatou Malo, ina ia soloia le faamai lenei mai fogaeleele o Samoa.

Lau Afioga i le Fofoga Fetalai, o le Tulafono lena ma ona faamatalaga.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

FOFOGA FETALAI: Malo! faafetai, ua manino auofala ma ua faapena ona malamalama lenei Tulafono. E tele itu ogaoga e aafia ai i le Tulafono lenei, e aafia i le Tulafono lenei ae lea ua oo oo lava i ai ia le saunoaga manino a le Afioga i le Palemia. E i ai le manatu o le a faataatiaese ia galuega a le Fono Aoaofaitulafono mo lana malologa se i taliu mai ona tuu atu lea o le avanoa, aua ailoga e toatele ni sui usufono e fia saunoa aua ua uma ona tatou semina ai i le aso ananafi.

Na faataatia ese Galuega a le Fono Aoaofaitulafono mo lana malologa i le itula e 10:49 i le taeao ma toe faaauau i le itula e 11:37 i le taeao.

FOFOGA FETALAI: Ou te faasilasila atu o le a toe amatalia Taualumaga a le Fono Aoaofaitulafono. E faia le malologa ua maea ona saunoa le Minisita e fitoitonu i ai le Tulafono po o le Afioga i le Palemia. Ia ua i ai le manatu ua oo mai le avanoa mo saunoaga faalauaitete. Ma ou te tapa ma le faaaloalo sui usufono mamalu o le Maota, mo saunoaga faalauaitete e tusa ai ma lenei mataupu ae ou te faamanatu atu, o lenei foi mataupu ua alu ai lo tatou aso atoa ananafi o tatou soalaupuleina, ma faamalamalamaina, e leai e le tauanauina, e na ona faamanatu atu i finagalo o sui usufono mamalu.

Se i tulai mai le sui usufono o Gagaifomauga Nu.3.

Afioga Hon LAAULI POLATAIVAO LEUATEA (Gagaifomauga Nu.3): Faafetai i lau Afioga i le Fofoga Fetalai o le Maota Fono o Samoa, o lea foi e faavaelupe le paia o le Maota, i ona tulaga mamalu ma ona paia sauoo, e malu ai le Fono sili a le atunuu. Faafetai i lenei taeao fou ua tatou feiloai i le lagi e mama ma le soifua manuia, tatou taunuu mai i le tatou Fonotaga foi o lenei masina, a o lo o mamau pea lago o le sa o lo tatou atunuu, i ona vaega eseese e aafia ai ma le tatou Maota Fono i lenei taeao. Malo afua i lau Afioga i le Fofoga Fetalai, aemaise foi le paia ma le maualuga o le tatou Palemene, faapea le faafofoga tapuai mai a si o tatou atunuu.

Ua laga se leo o lenei itumalo ona o le faatulai mai o le saunoaga Faa-Minisita a le Taitai o le Malo, le Afioga i le Palemia, tulai mai ai se tulaga faanatinati se Tulafono taua ona o mea ua tutupu mai i lenei vaitau i si o tatou atunuu. Ua faaigoaina o le Tulafono o le Alofa.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Lau Afioga i le Fofoga Fetalai, ua taaviliviligia matagi ma ua momoe foi matamatagi, aua ua faalologo Samoa ma le Palemene i le iuleo o le faavauvau. E le o toe po Malae i le loimata maligi ma le loto faavauvau ua aafia ai si o tatou atunuu. Na o tatou momoe ma manu ae talofa ua tatou alafai i le puapuaga sa tatou le mafaufauina.

Ae faataua i lou loto le taeao lenei le saunoaga a le Taitai o le Malo. O le Tulafono lea ua aumai, tatou te autilotilo i ai e toe aputiputi ma tatou faufau, tatu le too ma tepa i le ata, ma matimati po o le a le mea ua mafua ai ona tupu le faalavelave lenei i le atunuu.

O le upu lenei o le alofa lau Afioga i le Fofoga Fetalai, o se upu e lasi ona uiga. Ae fai mai le tala a lou tina iate au, “Laauli, o le alofa e lautua ai mea uma, o le alofa o le taunuuga lea o mea uma i le tagata soifua ma o le Tulafono sili foi lea.” E le aoga le pisa i le tamaoaga po o le malosi. A leai le alofa e leai se mea e taunuu i le taunuuga lelei. Ona ou fesili lea i ai po o le a le uiga o le upu alofa. Ae fai mai lana faatusaga, o le alofa e lapotopoto, e alo fa, alo mai lau Afioga tilotilo atu, faasaga i lea itu ma lea itu, e alo fa le fusiga o le fau o Malo.

O le taeao lenei ou te faafetai atu i lau Afioga i le Palemia, ona o le tulai mai o le Tulafono taua, e tatou te toe manatunatu ai. Aisea? O le a le mafuaaga na tupu ai le mea lea? O le a le mafuaaga ua tatou taunuu ai i le mea lea ua tupu? Ona manatu lea lau Afioga i le Fofoga Fetalai, o nai ou vaivaiga foi na avatu i nisi o tatou Fonotaga. O le atunuu ua uma ona tofi, ua uma ona faataatia le alafua, o le ogatotonugalemu e folau ai Samoa ma lona lumanai. E ala i le ituvai a le ekalesia, e ala i le ituvai o alii ma faipule, o matai, o nuu, e tau i fanau, e tau i le ulugalii ma lana fanau, e ala foi i le ituvai a lo tatou Malo.

O lou tautaualemau lau Afioga i le Fofoga Fetalai, ona e le faigofie i lou sui usufono, e le faigofie le tulai mai o le Tulafono.

O le uluai tui na maliu ai le tamaititi Savaii, o le alo o le nuu lenei o le alo foi o si ou aiga. O le tama lea na toatolu lana fanau na alu, o le alo e faasino i lo matou nuu. O le toatele o isi, e le i lalo ifo o le toasefulu. O le ala lea, avea lenei avanoa ou te faamaise ai i le atunuu. O lea foi ua maea ona e saunoa, e na ona ou faamaise atu i le tulaga aloaia, o lea ua tulai faaaloalo lou Palemene, ona o le amanaia o soifua ua maumau. E faapena foi ona ou faamaise i le itumalo. A o le fesili lea e tuu mai lau afioga. O Tulafono nei ua aumai e tatou te matimati ai, o le atoaga lea o le faataunuuga ina ia aua ne i toe tupu se mea faapea. O le fofu lea o le a tatou agai e fai ina ia aua ne i toe vaai Samoa i le ma’i lenei? Po o se isi’foi faamai po o nisi foi mala faale-natura e tulai mai?

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Lau Afioga i le Fofoga Fetalai, e le tusitusilima pe agai e tau le pua ma lafo. E tatou te mafaufau uma, o tatou ma le atunuu atoa, mai le vasega o faafeagai ma le latou foi matafaioi e fai i le atunuu, pule mamalu a alii ma faipule ma le Palemene. O nai ou vaivaiga ma ou manatu, e tatau ona tatou toe tilotilo po o le a le isi laasaga taua. We had to reconcile and redecide po o le a le isi mea e agai i ai mo le lumanai.

O le autu o ou manatu, o le upu alofa, o lea ua fai atu lau Afioga. O le matafaioi a le tama ma le tina ua fanau mai le alo, o le first responsibility, vaai le tamaititi lea ma tausii i mea uma. Ia tuu i ai mea uma mo lona soifua lelei ma lona ola aoaoina ma soifua maloloina, e tau lava ina oo i le oti, o le atoaga lena.

O le a le mea lea ua tatou vaai ai i le atunuu? O le a le mea lea ua o tatou silasila i ai? Ua moutou malie ese le upu lea alofa. O la e 120 pepe la e i uta i le Samoa Victim Support **abandoned** babies o la e tausii i uta ma le selau ma ona tupu tamaiti o la e agai e sue le mea e o i ai, ua le gafatia ma le saogalemu i totonu o latou aiga. Aisea? Ua manaenae ma malepe le o o popo i totonu o aiga, totonu o nuu, totonu o le fausaga o aiga ma le malu puiua i le mea e tatau ona i ai. O le olaga na tatou soifua ma ola mai ai. E faasaga ane lava le tamaloa ia fasioti lona toalua ma ave toe sisi, liliu ane lava fasioti, fasi matua malepelepe, faaoga agaese faaoga fana, tulou le Maota. O le auau o lou manatu, e oo foi i le aufaigaluega paia a le Atua, o lea ua outou silasila, e le alo se upu. Ua toe aafia lava le ekalesia, i auaua a le Atua, tulou le paia ma le mamalu o le aufaigaluega, tulou. Ae ua agai i le tulaga lena ua pala le olaga faale-agaga, ua matua masofa le tualuga, ua malepe le o o popo e maopopo ai le atunuu.

Lau Afioga i le Fofoga Fetalai, ona oo mai lea i lo tatou Malo, e le fai atu. O le a le mea na ala ai ona tupu? E fiu e fealofai, o le faatamala. E tatou te fiu e faalalanu, faatamala. Sa le faatinoa tiute ma faiva ma galuega. Ua uma ona fai Tulafono, tulafono nei tulafono taeao tulafono i lea tausaga, ua na ona tatou legislate ma implement ae leai se faatinoga. Leai ma se mea e tasi. O le ala lea lau Afioga i le Fofoga Fetalai, ua ou manatu e i ai foi le lape o tatou ma le tatou faiga Malo. A lea tatou te vaai i ai, ua leva ona tatau ona sort out le Health. A le o falemai, tetee foma tetee tausisoifua. O lea la ua tatou taunuu nei i le taunuuga sa o tatou le mananao i ai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea faatoa fai la tatou Tulafono, e faamalosia ai tui o fanau. A o le faapogai foi o le fai o tatou Tulafono, ona e le faigofie ona faatalitonuina le anoano o tina o Samoa aemaise tina e le i faia tuio latou fanau ona o lea foi e i ai le isi a tatou aga faasamoa. O lea tatou te o muamua i ai, o tatou taulasea. Ma o lea foi ua uma ona ou talanoa i lena mea. Ou te le faitioina foi taulasea i le tulaga o le talitonuina o latou, leaga e pau ia o fomai na o tatou toomaga i ai, ae le i aumaia ia vailaau ma tui ia i tua atu o le 1963. O la lava e soifua mai le toatele o i latou, na lavevea ai i le mai lea, ma o foi uia le auala lea. E na ona ou fesoasoani atu i le sui usufono, se i faamama le sausau. O lea faatoa fai la tatou Tulafono e faamalosia ai le tui. Ua ala ona ou taua le mea lea, ona o le saunoaga a le sui usufono, ua pasi a tatou Tulafono, ae leai se mea o faia. E tatau ona ou faasaoina lau afioga o lou tulai atu lena. E faafetai, manaia tele lau agiagi i le taeao lenei. E na ona pau lava lea o si vaipanoa lea ua ou faatafatafa atu ai, ina ne i te i foi ua avea ma ulutala i le nusipepa ma aveseseina ai le mamalu o le atunuu.

Susuga Hon LAAULI POLATAIVAO LEUATEA: Faafetai faatafatafa i lau Afioga i le Palemia. Faafetai timai, o lenei lava e avatu vaivaiga, o motugaafa. O lena e i ina le malosi atoatoa, full power e fai lava le mea e finagalo i ai le Malo. Ao le tualalo lau Afioga i le Fofoga Fetalai, e le fai ai.

E tatou te fiu e fau nei fau taeao fau talaatu taeao, a tatou le o e lote le mata o le mai tulou, atilo, se i le muliaa. O le a le mea e tupu i le atunuu? E le o fesootai le pule mamalu a alii ma faipule, ekalesia ma le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr, Sailele Malielegaoi: Se i ou toe talanoa atu lava.

FOFOGA FETALAI: Se i onosai mai le sui usufono se i talanoa mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea lea agai i le atilo, o lea ua tatou oo i ai le taimi nei.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

O le fautuaga ia i latou na e sao le fautuaga, ae pau le mea o lea e misi i le fautuaga e le o i ai se faamalosiga. Aua a misi mai i ina ae pue e i. O lea la faatoa mafai ona tuu i ai le malosi e mafai ai ona faatino le mea lea lau Afioga i le Fofoga Fetalai. E le faapea e tutusa uma nuu, e le tutusa uma foi pulega e le tutusa uma foi tagata o lo o faaitnoina. O le isi faifeau e pei lava o i tatou o isi foi tagata. E malosi lana savali, ao le isi faifeau e na o le tutu mai lava i luga o le pulelaa ma talanoa mai ai. Ua leai se malosi o le tino e savali ai ma tilotilo i mea ia. Lau Afioga i le Fofoga Fetalai, e pei o le tulaga lena o lea ou te faatafatafa atu ai i le sui usufono o lo o saunoa nei, ona o lo o fai ma agai i le nauna lautele. Ae agai mai pea faavaapiapi i le tulaga tonu lava lena i le tatou Tulafono, o lea faatoa maua le malosi i i, o i latou uma o lo o umia le pule. Aua e fiu lava e sausau le mea lena, ae a leai se Tulafono e tua i ai, e na o se sumepalo tagitagi.

FOFOGA FETALAI: Onosai mai lava le sui usufono, se i fautua atu le Nofoa. O le fautuaga a le Nofoa ia aua nei fetaai le tatou...ona o mea e fia faasao ma fia faamalamalama aua e le uma lava le tulai mai o le Malo. Ae e matau atu ma le agaga fiafia i le naunau mai o le sui usufono e saunoa ina ia saili le fofo. Ae na ona faamanatu atu, o le a le fofo tatou te avea? Aua e tutusa uma lava tagata na faia e le Atua, ae tasi lava le mea e eseese ai. Na tuu i ai e le Atua le mafaufa e faaoga a o le isi tagata e le faaogaina le mafaufau. O le eseese lena, e tutusa uma tagata tuu i ai ma le mafaufau. A le fia faaogaina lava le mafaufau e ave tamaiti e tui e le avea. O le fesoasoani atu lena, leaga a e leaga e sausau i le itu lea, ae o se faamanatu lena. O fea lava tatou teasa e se i mai le atilo ma tilotilo i ai i le mafuaaga. Ae a musu lava le tama a le loomatua ia e ave tamaiti e tatui o lena.

O lea ua fai le Tulafono e faamalosia ai, ia se i o tatou o e fai lea Tulafono pe a. Tulai mai le sui usufono.

Susuga Hon LAAULI POLATAIVAO LEUATEA: Faafetai i lau Afioga i le Fofoga Fetalai. E leai lava se agaga e faataumatatao, e saolele lau saunoaga, e saolele foi le saunoaga a le Palemia. E pau lava lea o le mea lea ou te tautau le mau atu ai. Leaga o lea ua amata ona fau tulafono faamalosia. Na tatou feola mai e leai ni tulafono, e leai ma se isi na oti, ao lea la ua tatou taunuu nei, seiloga e faamalosia ona leai lea o se tagata e oti. O i lea ou te agai atu ai lau afioga e avatu le...o lea ou te agai e faamalosia le tafatolu lea o faigamalo lea e i tua atu.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e tatau lava ona ou faasao le mea lea. E le mafai o na ou nofonofa ae alu loa ni upu faapea, e faavalevatea. O lea e faapea mai, a o le i faia le Tulafono lenei, e leai ma se isi na oti. Lau Afioga i le Fofoga Fetalai, se ou te ofo, i le fai matilatila o nei upu. A o lea e avatu le Tulafono e taofiofi ai le mea lena. O le mea lea ou te fautua atu ai i le sui usufono, toa.

FOFOGA FETALAI: Malo faafetai. Se i tautuana ma le sui usufono o lo o saunoa, Gagaifomauga Nu 3.

Susuga Hon LAAULI POLATAIVAO LEUATEA: Faamalulu atu, e asuasua atu vaimalu i puega i lau afioga i le Palemia. O nai ou manatu e fofofa ai ma poupu ai lou finagalo. E le i uma atu nai ou lagona, O le poutu o le Faigamalo a Samoa o iinei.

FOFOGA FETALAI: E i ai le upu foi lea na fai e toeaiina i le isi tulafale faatoa alu e tufa le ava, mama se le sausu. Mama le sausu leaga e fai e faalele a o e matau, aua e leaga e le na o lau Afioga o lo o e tiga i le mea lenei, tiga alofa, o lea tatou te tiga alofa uma i le faalavelave lenei. Ioe, ae tatou te faamoemoe i le Atua, tatou te saili fofo, saili togafiti, tapena lea mea ma tapena lea mea, ae faalagolago i le Atua. E faapena la le mea lea tatou te i ai, e le o ia i tatou se fofo o le faafitauli, tatou te saili ae faalagolago i le Atua, a lea sa tatou faafofoga nei a o saunoa le Palemia, o fea ea le tausaga... ia e afe ea ma ona tupu oti i le mea lea, maliu. Ioe. A o lea faatoa 71 ea 73. O lona uiga, o lea foi faatoa ou te i atu au, a o le molimau lena ma le lipoti mai lena o faamaumaga o le faasologa mai o faamai i le atunuu mai le 1918. O le mea la lea, malie le sui usufono, e le na o lau Afioga o lo o e tiga alofa, o lea foi matou te tiga alofa. Ae faaiu maia le saunoaga.

Susuga Hon LAAULI POLATAIVAO LEUATEA: Faafetai lau Afioga. Ia, lau Afioga i le Fofoga Fetalai, o lau manulauti o le faaaloalo, e le faia lava se tulaga e toia ai lo tatou va faafeagai ai. Ae o nai ou lagona, e faamalulu atu pe afai e le logomalie ma le paopapa i la outou faafofoga. O le agaga lena e pei ona ou fai atu, se e tau i ivi ma itutino leaga o tagata o aiga ma fanau, o le ala lea o le taumafai atu e molimoli atu le feau pe faapefea ona tatou omai e fusi le fau o Malo aua ne i toe tupu le mea lea, a o lea ua e faafofoga mai ua ave lau tuualalo i le Ekalesia, ave lau tuualalo i le pule mamalu a alii ma faipule.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

E le tau aoaia e Laupua Tamafaiga, o le tofa ma le faautautaga na folau mai ai Samoa mai le amataga, o la e i o. A tatou o i le upu tuusao, e le tau faia se Tulafono e faamalosia ai le mea lea, o la e i ai le tofa i aiga, faleupolu, o latou e omai e fai mea ia, faatonu i ma i. O le faalavelave, e ese le faamuamua, e o nai olomatutua e lalaga le iniini ma fai isi mea ae tiai le tui. O le ala lea lau Afioga, faafetai o lea foi ua agai i le Fono Act, ua matua tataua ona faamalosia le Fono Act e faamalosia ai alii ma faipule e o e fai mea ia, e le tau aoaia le atunuu ua latou iloa le matafaioi fai.

O le ala lea o lou fai atu foi i le Malo, faamolemole aua le tenaia outou finagalo, na tatou iloa lelei lava le mea lea e tupu i le Soifua Maloloina, lea e avatu ai le tuualalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e leai lava se isi e tetena i ia mea. Ae tataua ona faamama le sausau, e le faatonuina foi le tofa i aiga. E pau lava le mea e fai e tatou o le faufautua ma tuu atu i o latou lima le malosi faaletulafono e faatino ai mea ia, ona ua malosi tele le mea lea ua tupu mai aso nei. O le a le mea lea ua tupu mai aso nei? O le fai o iuga a nuu ae sau upu valea mai fafo. O fanau a le nuu e faaleaga ai le nuu. O le mea la lena tatou te liolio i ai, o lea foi e faafeagai le pulega mamalu a alii ma faipule ma le anoano o mau luitau i nei ona po i fesootaiga televavave ia e soona lafo ai manatu e aafia ai le pulega mamalu a alii ma faipule. Ma o le mea moni lava, o i le taula o Malo, o i le pulega mamalu a alii ma faipule e maua ai le filemu ma le amio pulea o tupulaga fai mai o le atunuu i le lumanai. E pau lava la le tatou mea e fai o le faufautua ma ave le malosi faaletulafono.

Lau Afioga i le Fofoga fetalai, o le tulaga lena ae le o le soona malosi i le mea o le soona faatonu o le tofa i le paia i aiga faapea foi le mamalu aua Tumua ma Puleono i Salafai, ia o la e i ai, na o le faamalosiau atu o tatou e ala i saunoaga ma tuualalo e avatu i le Maota lenei.

Lau Afioga i le Fofoga Fetalai, o lau toe tulai atu lena e faufautua i le sui usufono mamalu o lo o saunoa nei.

FOFOGA FETALAI: Ou te toe faamanatu i le sui usufono.

Susuga Hon LAAULI POLATAIVAO LEUATEA: Faafetai i lau Afioga i le Palemia. Faafetai o le a faauma au upu lau Afioga i le Fofoga Fetalai.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

FOFOGA FETALAI: Ia, o le sui usufono foi sa o matou faaolomaau lava i le taimi foi o e saofai i le Nofoa nei, o le a lava lau saunoaga matou te usitaia lava ma faalogo. O le mea la lea e i ai le manatu o le Nofoa, e malu lava le Nofoa i le paia o le Palemene, aemaise lava o sui usufono ua foi atu i le Nofoa. O le mea la lea, alofa ia le sui usufono aua e le mafai lava ona tuumamaina e le Malo le tulai mai e faasao ma faamalamalama mea e aafia i saunoaga a outou Afioga.

O le mea la lea, sui usufono mamalu e, e pei e faapena se fautuaga, ae malie faaiu maia le saunoaga ua lava lea o lea lava ua e oo i ooooga o mea uma.

Susuga Hon LAAULI POLATAIVAO LEUATEA: Faafetai, o le a foi Sina i Futu. Lau Afioga i le Fofoga Fetalai, foi so matou leo, pau lava o lea na ona ou faapulapula leaga o la e faafofoga Samoa, e leai sou agaga e aoi le tofa ma le faautautaga a le atunuu. O ai? O ai le tagata na te vaea le fala ooto ia Samoa? E le o lena, ae pei ona taumafai atu i le sootaga vavalalata o le pule mamalu a alii ma faipule e tau i aiga ma fanau ma le ekalesia ma le Malo, o lea ou te agai atu ai lau Afioga. Toe faamalosi le vala lea, aua e le na o le pau lea o le mea lea e agai mai, e i ai foi isi falemai matautia lea e loloma. A o le tatalo, amata mai le mata o le vai, family value, e aumai e foia le mea lea. A le foia i ina, tatou te fiu e alalaga. O le ala lea lau Afioga o lea ou te tuualalo, tatou o i le mata o le atilo, le faafitauli, le muliaa e se i, aua ne i toe tupu taeao. E oo foi la i lo tatou Malo, e faamalulu i le Matagaluega, e le i faapea ua valeina la outou galuega, ae i ai lava lape o le olaga lenei tatou te i ai, afai ua sipa le lamaga ma sala le la afa ma le la fala, toe faatu le too o le savili, aua ne i toe tupu le mea lea. E le i taugofie le 70 ma ona tupu tamaiti ua maumau soifua.

O le mea lea lau Afioga i le Fofoga Fetalai, le tapuaiga a Samoa, afai e sala le gagana, ia faafoi mai ia Laauli. Lou itumalo, so tatou sao ia Manuvao leaga e le faigofie le malaga a le maliu ma le oti e ave le ola, o meaalofa a le Atua na aumai tatou te tausii i ai.

Ia, se upu ua lagavale lau Afioga i le Palemia, o le alofa moni lava e fai atu, ma o le alofa lena e oo i le oti i lau Afioga ma lau Kapeneta. Lau Afioga i le Fofoga Fetalai, faafoi mai sou faaletonu. A o le tulitulimatagau, e le na ona omai pei o tatou upu e omai e ufiufi pe milimili faauu leaga ua fano le atunuu. Manuia le Fono a Samoa.

FOFOGA FETALAI: Faafetai. Malo. Ia, pasi mai i i masalo e le toatele ni sui usufono e fia saunoa i le mataupu lenei.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, na o le lua lava nai au mataupu lau Afioga ma lou faaaloalo.

FOFOGA FETALAI: Ua tele foi le lua, ae se i tuu atu muamua la i o i le...

Afioga Tafua Maluelue Tafua: Ia ua lava a le tasi ma le afa. Faafetai.

FOFOGA FETALAI: Ia, talu ai ona o lea ua toe pau i lalo, ia tulai maia lau Afioga i le Matua.

Afioga TAFUA MALUELUE TAFUA: Faafetai. E lele a le tavae ae iloa i ona fulu. Fai mai foi le isi upu, e alu le paa ae iloa lona mua. Lau Afioga i le Fofoga Fetalai, na o le lua lava mea na ou tulai atu ai, e faamanuia atu le Kerisimasi i lau Afioga ua leva ona e gasegase a o lea ua e malosi, ma faamanuia i lou itumalo o la e faalogologo mai, e ui lava ina puapuagatia Samoa i le mala, ae faafetai i lau Afioga i le Palemia ma le Kapeneta. Faafetai foi i le sa avea muamua ma Minisita o le Soifua Maloloina, faapena foi ma le Minisita o lo o i ai nei, ma le lua Sui Minisita le Susuga ia Salausa ma le vaega.

O le Tulafono Tau Faaofi leni i lau tilotilo i ai, e tasi lava le vaega lea ou te tulai atu ai e faamanino ma le faaaloalo, o lea foi sa ou laga ananafi, sa saunoa mai le Loia Sili ma i latou na fausia le Tulafono le afioga ia Teleiai. Ae ou te le i oo atu la i le vaega lea, se i faamanino pea le... faafetai o lea ou te tilotilo masalo e sese le mea lea na i ai ananafi e \$10,000 up to \$10,000 le vaega lua o le Tulafono, a o lea ua ou vaai atu ua toe faasao e \$5,000. O le mea la lena na ou fialia ai e faailoa atu i lau Afioga i le Fofoga Fetalai, i lau lava tilotilo i ai i le Tulafono Tau Faaofi, e pei o i e iloa mai ai le tatou alolofa i le atunuu, o i foi e iloa ai le tatou amanaia faatama o le tatou naunautaiga o le Malo ia foia le faafitauli lea e tupu mai. I lau lava ia faaliliuga o le Tulafono, ua leva ona tataua ona fai, e moni o la e i ai, ae le i mamafa tele. I lou la talitonuga, o le poloaiga lea e aumai e tatou, o le poloaiga e faamanatu i matua, aemaise lava matua talavou. O le tele na o matua talavou la e i ai e faatamala, masalo e i ai nisi o le matou nuu sa pau, ia ae na afio atu lava le fomai ma lana tausimai faataamilo i le nuu atoa ma le itumalo atoa aua le faia o tui puipua o tamaiti.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ae i ai lava foi le masalosologa, e i ai nai aiga ai o misi, o lea la ua logo i ai le pulenuu ma i latou o le tofi tamaitai o le nuu, o le latou tiute lea e savalivali i aiga taitasi e saili po ua mautu ona fai tui puipuia o fanau e le i tuia. Aua o le taua o le Tulafono lenei, afai lava pe ua tui uma le 99% o le atunuu ae i ai le 1% la e totoe, e le aoga atoa lava. E maumau le taumafai lea e fai nei ma lenei fia sefulu miliona tala lea o le a faaalu i le tatou taumafaiga lea e fai i le tui puipuia. Ae a malilie uma le atunuu e tui uma tagata, ia e faigofie foi lena, e le toe pepesi se isi faamai o i luma e pei ona atugalua ai le Afioga ia Laauli, ae sao foi le atugalua a si toeaina, e i ai nai ona alo sa aafia lea na tui sese i Safotu, la e ua i ai le faaiuga o tamaitai tausimai. O le a ou le oo i tua pe toso i tua lau tala, a o le puipuiga o le saogalemu ma le soifua o le atunuu, ia pei o lea ua ave i ai le faamuamua a le Malo. E momoli atu ai le agaga faafetai ma le faamalo. Faafetai i le Kapeneta, malo le faufautua, faafetai foi le onosai. Afai e tele atu tala a le atunuu ma... ia, malo le faapalepale, e iloa lava le tautai e matapoto i aso faapenei. Malo le onosai, faafetai i lo outou le logo tiga, o le ala foi lena e le te i te i tofi outou e le Atua i lena tofiga, e lava lo outou faautautaga, lava le mau o le toovae e faatoatoa ma faapalepale le atunuu.

Ae momoli atu foi le agaga ma le faamaisega ma moomooga alofa mo nai aiga sa aafia, aemaise i latou na aafia i le faamai ua maliliu ai nai o latou alo. Ia, e pei o se tala lea e avatu i lau Afioga i le Fofoga Fetalai e momoli atu ai le agaga faafetai ma le faamalo i le Malo ae faapea foi le tapuaiga a le atunuu.

Ae malie lau Afioga, se i fai lava sina au upu laitiiti i lou itumalo. Afai o faafofoga mai Aleipata i Sasae ma Sisifo, ia, o moomooga alofa ia, faafetai i le Atua e leai se isi o malaia i le faamai, ia manuia le Kerisimasi ma le Tausaga Fou. Ia manuia le tatou Fono. E faapena foi i a outou Afioga i le Kapeneta ma le mamalu o lenei Itu.

FOFOGA FETALAI: Malo. Se e le tau selu atu i lauga a tama matutua. Malo ia te oe le Tuiatua Faanofonofu lau Fetalai i le Matua Tafua, malo faafetai. Ia a maea le saunoaga a le sui usufono mo Palauli le Falefa ona sosoo lea ma le sui usufono mo le Vaimauga Sasae ua leva lava ona tulai mai ona sosoo ai lea ma Olo.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga. Ia, e le tele foi se tala, pau lava le mea e lagolago i le Tulafono Tau Faaofi. Ma o le Tulafono Tau Faaofi, o lo o manino ma malamalama lau Afioga.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Na pau lava le mea lau Afioga i le Palemia e faaopoopo ia faamanino lelei le aofai o tui puipui ma le faamaoniga sa'o atoatoa e agavaa ai tamaiti e aoga, ina ia faigofie ai ona iloa certificate a po o le fai foi o certificate nei e le amiotonu ma faasalaina ai i latou.

O le Tulafono Tau Faaofi, e le na o le misela le faamai pipisi o lo o i ai i i, e 16 isi faamai pipisi lea e i ai i le teuteuga, o le mea manino lena o lea na faamalamalama. Na pau lava le mea sa tuualalo ai i le Matagaluega, ou te iloa o lea ua faafofoga mai, o le mea foi lenei o le faatupega o tui puipui, e tatau ona aafia i i. A leai, e tatau ona aumai i totonu o le Tulafono Faatonutonu, leaga e le o silafia e tagata e free, e leai se tau. O le faamalamalamaga a le Faatonu Sili, e au i le 15 tausaga o tamaiti tui puipui e le totogia, e tatau ona malamalama. E pei o le mea lena o la e popole ai le tele o aiga, pe faapefea ona latou taumafai e fai nei mea a o mea e le totogia. E tatau la lau Afioga i le Palemia ona i ai se mea ia silafia ai e le mamalu o le atunuu, e le totogia tui puipui mo alo ma fanau. O le mau a le Fai Salamo. "O fanau o le tofi mai le Atua, o meaalofoa a le Atua mo tatou. O fanau o u fanafana i lima o le toa." O a tatou fanau, o le manuia mo a taeao." Faafetai i le Tulafono, faafetai i le auunaga. Tuilaepa ma le mamalu o le Kapeneta ma lena Itu aemaise foi le aufaigaluega tofofi a le Malo, faamalo galulue, ia fesoasoani le Atua ma faamanuia le Atua i a outou galuega. Ia manuia le tatou Fono. Faafetai i lau Afioga i le Fofoga Fetalai.

FOFOGA FETALAI: MaloPalauli le Falefa, e le selu atu. Malo faafetai, leaga o le aumatutua sa i totonu o le Kapeneta o la e latou te silafia e le faigofie le galuega a le Palemia ma le Kapeneta.

Tulai mai le sui usufono mo le Vaimauga i Sasae.

Afioga SULAMANAIA FETAIAI TAUILILI TUIVASA (Vaimauga Sasae): Lau Afioga i le Fofoga Fetalai e faafetai mo le avanoa o lenei itumalo. Maea foi ona paleauau le taliga o le sua i lenei taeao. Ina ua fai foi le malutaeao i fafo sa ou tuualalo atu foi ma ou faatau atu ia Laauli Leuatea, ia saunoa ia oe e fai ma sui o Pule i lenei Tulafono. Ia ona aumai lea e fai ia Tuisamau ma sui o nei i Tumua. E na o le lua lava ia lauga leaga o le Tulafono Autu lenei. E leai lava ni isi finagalo o le atunuu e faali i ai. Ae ua ou faaloalo ona o lea ua tulai Tuiatua, o le ala lea ua ou toe nofo ai i lalo ia le...

Ae o le Tulafono lenei, e matuai matagofie i le faalogologo. Leaga o le Tulafono lenei o lea e fia faalogologo i ai le atunuu. Fai se Tulafono aua le tulaga lea ua pagatia ai Samoa e ala i le faamai. O le agaga la o lenei sui usufono, a lelei lava le Tulafono ma tuuina mai, e talia gofie foi e le sui usufono o Vaimauga. E pei la ona i ai lenei Tulafono.

17 TESEMA 2019**Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ae ou te faafetai lava i le Atua, o lo o i ai se Faigamalo ma se taitaiga, o lo o taitaiina i le finagalo o le Atua. E ui lava ua maliliu nai fanauiti i le valaau paia a le Atua, ia ae o lea ua toe oo Samoa i ona oo ooga ua mafai ona toe tuuitiitia e pei o le mea sa i ai i le amataga, amata atu lava 5, 6 ia alu ifo faapena. Ou te faafetai ai i le Atua, i lenei Paeaiga o lo o tatou i ai, e matatau ona Taitai i le Atua, ou te faafetai ai lava i le Atua, i le lototetele, i le tatou finau i le Atua. E leai se isi e le i galue i lea tulaga aemaise ua fai faapitoa nei aso malolo e lua.

O lou agaga faafetai lea i lau Afioga i le Palemia ma le Kapeneta, ma tatou uma lava le Palemene o Samoa, aemaise o Ofisa Sili o Pulega ma Matagaluega a le Malo ma Samoa atoa lava o lo o tapuaia faiva alofilima o tatou. E oo foi i le Aufaigaluega Paia a le Atua, a lea ua tali le Atua. Ua tuumamaina le.... ae tatou te le atuatuvaile ai, tatou te le faanoanoa ai foi leaga o fuafuaga foi a le Atua. A e alu lelei e faitau le Tusi lena po o le Teuteronomie e 28, lena e fai mai ai le Tusi lena e aumai foi e le Atua faamai. Ioe pe a tatou o ese ma le finagalo o le Atua, e aumai foi e le Atua faamai pe a tatou o ese ma le finagalo o le Atua.

Ae lagona foi le faanoanoa i tuuaiga, e oo foi nei i le taeao, faafetai lava. Ao lou faalogologo foi i sui usufono ia na tatalo, ia pei ua tuuaiina le Palemene lenei, pei ua tuuaiina tatou. E pei o lea e sese tatou, se e leai. O le mea lena e leaga ai le o fua fia tatalo ae le tuu le mea ia a le aufaigaluega a le Atua e o mai e tatalo. O le Fonotatalo a le atunuu.

Afioga Aliimalemanu Alofa Tuuau (Alataua Sisifo): O le mea e fia faasao lau Afioga i le Fofoga Fetalai.

Afioga SULAMANAIA FETAIAI TAUILILI TUIVASA: O le mea lea lau Afioga i le Fofoga Fetalai, ou te lagolagoina le Tulafono, ona o le tulaga lea e manaia ai, e pau le tulaga e popole ai...

FOFOGA FETALAI: Ia, ona o lea e tulai mai le Taitaifono o le Komiti o Tupe, ia aua ou te leiloa po o le sui usufono lea e agai i ai lau saunoaga, ana le tulai mai... se i tulai mai pea le Afioga i le sui usufono mamalu.

Afioga Aliimalemanu Alofa Tuuau: Lau Afioga i le Fofoga Fetalai ou te tulai atu se i faasao le sui usufono lea mai le Vaimauga. Leaga pe leai ni tofiga faafaifeau, ae a oo ina valaauina le tagata, e i ai le lagona o le valaauina e le Atua, o le mea foi lena e faagaganaina ai le gutu, i upu e tatau ona tautala ai.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

O le faamagaloga la, e le o se mea lena a le sui usufono. O le faamagaloga mai le Atua lea sa tatalo ai le sui usufono o Alataua i Sisifo, ae e le o ia lea na faia i ai lau faatoesega ma le faaaloalo lava faafetai.

Afioga Hon Afamasaga Lepuiai Rico Tupai (Minisita mo Fesootaiga ma Faamatalaga Vavave Faaneionapo): Lau Afioga i le Fofoga Fetalai, leaga o lea e saunoa ia le sui usufono mamalu ia matou nei sa tatalo.

FOFOGA FETALAI: Oi sa e tatalo foi oe? Ia saunoa mai.

Afioga Hon Afamasaga Lepuiai Rico Tupai: E leai o le mea e fia faasao, o le valaaulia lea sa ou tatalo ai nei i le taeao. Ae e pau le fautuaga i le sui usufono mamalu, aumai ni mea o le Feagaiga Fou ae aua le aumai soo ia mea o le Feagaiga Tuai ua uma ona maliu Iesu i le Feagaiga Fou sui atoa loa ma le tala o tatou. Ia faafetai.

FOFOGA FETALAI: Ia faafetai.

Tofa Nafaitoa Talaimanu Ketii (Gagaemauga Nu.3): Lau Afioga i le Fofoga Fetalai...

FOFOGA FETALAI: Ia, tatou see atu ia i le Tulafono, ia saunoa ia.

Tofa Nafaitoa Talaimanu Ketii: Faafetai mo le avanoa i lau Afioga i le Fofoga Fetalai, sa tau manatu lava e pei o upu e fai i le Salemuliaiga, pe tuu i luma le vaa pe solomuli. Leaga o lea ua saunoa le sui usufono mamalu i tulaga o le polokalame na fau aloaia e le Maota lenei. E le gata i lau Afioga i le Nofoa, ae o le tagata lea e tautala, tulou le Failautusi o le Maota.

E i ai lea o le lagona e tuuina atu ai se fautuaga, leaga o lea ua foliga mai e sosoa e le lauga a Vaimauga le pule tutoatasi a le Maota ma ana polokalame. E le i soona tofia sui usufono mamalu aua ia tofiga e talosia ai le faamoemoe o le Fonotatalo sa feagai ma le Maota lenei i le taimi ua sola.

O la e faafofoga le Atua, e leai se mea e lilo i Lana Silafaga Paia. O le mea lea ua ou tulai atu ai lau Afioga i le Fofoga Fetalai, e aveese upu ia ma faamaumauga a le Maota a le sui usufono mamalu, ae alo le sui usufono mamalu i le lauga. Ae o le tulaga i le Polokalame aloaia, e tataua ona faaeteete i ai sui usufono mamalu.

17 TESEMA 2019**Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Na ona ou tuualalo atu faapea leaga e le lauga lau Afioga, o lou tiute lea ma lou faiva alofilima e ao ona toe faamanatu atu. Ae ia manuia le lauga.

Tofa Lealailepule Rimoni Aiafi (Faleata i Sisifo): Lau Afioga i le Fofoga o le Fono...

FOFOGA FETALAI: Ae a pe a... e pei o le a avea ma avega mamafa le tulaga o le mea lea, malie le sui usufono e aua tatou te faamamafaina le lauga a le Vaimauga.

Tofa Lealailepule Rimoni Aiafi: Leai lau Afioga o lea ou te fia agai i le Sui Fofoga Fetalai lau Afioga ona o lea ou te maua sa faatoa foi mai i Niu Sila sa ave e taoto lona fatu, ne i te i ua leotele, leotele uma atu le misela ae tatou pisi ai.

FOFOGA FETALAI: O le mea tonu la lea o le sui usufono loto alofa, ia lea e faamanatu mai ia ai sa maua sa gasegase lau Afioga i le Sui Fofoga Fetalai.

Malie le sui usufono o Vaimauga se aua ia e te toe oo i lea mea, ioe. Faaiu maia le saunoaga ua uma foi lou taimi.

Afioga SULAMANAIA FETAIAI TAUILILI TUIVASA: Ia e usitai lava le sui usufono leni i lau Afioga i le Fofoga Fetalai. Ia o le tulaga o le Tulafono leni e lagolagoina e leni itumalo. Pau lava le vaega sa....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Ia se i tulai mai le Palemia, ia e le i tatalo le Palemia ae lea ua toe tulai mai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea leni o le Tusi Paia, leaga e i ai matou nei e le faitau Tusi Paia, ae matou te faalogologo i lauga a isi ona matou... matou te o la i le auala puupuu short cut. E matou te faalogologo lea ona matou aoao lea.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

O le Tusi lea na e tau maia e na o le mataupu, ae o le a le fuaiupu? Aua e taua tele i lau faalogo atu. Ua e tuuaina le Atua sa aumaia le faamai ae o lea sa tau fesili ia Laauli po o ai na mafua ai ona aumai le faamai. O le taua lea o le tatalo, aua tatou te augata e tatalo, leaga o lea e te talanoa ma le Atua. O lea e te talanoa i le Atua. Ia ia i tatou le agaga fiafia, e talanoa i le Atua i taimi uma. Aisea? Leaga o la na faatonu mai tatou e le Alii.

E na o le pau lava le mea o lou fesili, ona avatu lea o le fesoasoani, ao le auala lea e ave ai lau fesili.

FOFOGA FETALAI: Malo, faaiu maia le saunoaga.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, ina ua taunuu mai lau uo faifeau mai Niu Sila, o le tamaloa o le Aferika, o le faievagelia.

FOFOGA FETALAI: E le o i totonu o le Tulafono na mea.

Afioga SULAMANAIA FETAIAI TAUILILI TUIVASA: Ona taunuu mai lea o le tamaloa, ma afea lou fale, e pau lava le mea na ou fesili i ai, e fia oo la le toaina i le Palemia e fia feiloai i ai ma fai se appointment. E pau lava lau tala na fai i ai le tamaloa lea...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea e le i tali maia lau fesili ae aua e te toe talanoa i na mea. Aua e te talanoa mai i lena mea i le talanoaga a le faifeau, aua e manatua a talanoa atu le faifeau ia te oe, na e taofia lea na o le lua talanoaga ma le auauna a le Atua na auina atu ia te oe, taofiofi. O lou le taofiofi lea e tau feleia ai oe e le Maota.

Afioga SULAMANAIA FETAIAI TAUILILI TUIVASA: Ia o le a ou le... ou te fia tali i le Palemia i le Tusi lea, o le Teuteronomie e 28 fuaiupu 1-15, o lena e faapea mai, 'afai e fai le finagalo o le Atua, e manuia lou ulufafo, e manuia lou ulufale e manuia uma lava mea uma. E manuia lau fanau, ae o le 15 la agai i tua, o le Teuteronomie lava lea e 28, e aumai ai malaia ma faamai na, e oo foi pe a le...

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lena sa ou fesili ai e aumai tonu lava le fuaiupu, ae o lea ua aumai atoa le mataupu. E na o le fuaiupu lava na ou fia faalogo i ai, ae ua lava lea o le a ou alu pogisa lava i ai faapea.

Afioga SULAMANAIA FETAIAI TAUILILI TUIVASA: Ia o le a ou talanoa i le Tulafono o lea ua... e le i faitau foi le Palemia i le Tusi Paia. A o le Tulafono, e pau lava ia lou popolega, o lea ua tagofia fua le Matagaluega a le Minisita o Aoga, toe tagofia le Matagaluega a le Minisita o Tina ma Tamaitai. Ae sa i ai le naunautaiga o lenei itumalo, fai pea le Tulafono agai i le Matagaluega lea e tupu ai le faafitauli, le falemai. Aua o le tulaga lea ua tulai mai, ou te faafetai lava i le Minisita lea ua tulai mai i le Falemai. E le o se fomai ma lana sui lagolago, ae o lea ua o atu nei, ae fetau tonu lava ma le malaia lea ua tulai mai i le tatou atunuu. E le o se malaia la i le taimi o oulua ae o malaia a isi ia sa i ai muamua lea ua oo mai ia oulua.

Ae faafetai i le Atua ua tofotofoina ai oulua, e le o ni fomai ae sa i ai fomai ae o lea la o atu tonu lava oulua ae tupu tonu le mea lea. Faafetai i le lototele i le Afioga i le....

Afioga Hon Tuitama Talalelei Tuitama: Lau Afioga i le Fofoga Fetalai...

FOFOGA FETALAI: Ia, ona o lou finagalo, ae saunoa mai. Tulai mai le Minisita mo Tina ma Tamaitai.

Afioga Hon Tuitama Talalelei Tuitama: E faaataata lafoga ae le manuia saunoaga a le sui usufono. Ou te tulai atu ma le agaga faaaloalo i lau Afioga i le Fofoga Fetalai, aveese upu ia ma faamaumauga, leaga o le tuuaiga e le mafai ona faamaonia, ma le agaga faaaloalo.

Afioga SULAMANAIA FETAIAI TAUILILI TUIVASA: Ia o le a faauma le lauga a Vaimauga. Salausa, e momoli le agaga faafetai i le Minisita Lagolago lea o Tina ma Tamaitai. Faatoa malamalama lenei itumalo i lau polokalame lea e alu atu i le leitio ma le sui sinia lea o le Matagaluega a Tina ma Tamaitai i le faamalamalamaina o le tulaga lea.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ae o le popolega o lou sui usufono, sa ou manao lava faapea ita e faatino lava se Tulafono, e pei o lea e le o faia se mea i le falemai, ae o lea o le a tatou tagofia le Matagaluega o Tina ma Tamaitai. O lona uiga, o le a toe faaopopo foi le avega. E le gata la i sui tamaitai ia ma Pulenuu, ae ua tatau foi ona toe silasila i ni totogi e tuuina atu aua o lea o le a...

E pei o le agaga lena lau Afioga i le Palemia, e lagolago e lenei itumalo ae na pau lena, sa ou faapea e toe faaopopo pea se Tulafono e agai lava i le falemai, o lea ua tagofia ia le Pulega a Alii ma Faipule, tagofia foi le Education ia Loau, ae o le a le tulaga i le Tulafono a le Falemai? O lo o malupuipua pea, o se agaga lena lau Afioga i le Fofoga Fetalai, ae ua lagolagoina e lenei itumalo le Tulafono.

FOFOGA FETALAI: O le a le mea se i tau avatu ai sou finagalo. Se i Minisita foi oe i le Soifua Maloloina, ona faatino lea o na mea.

Afioga SULAMANAIA FETAIAI TAUILIILI TUIVASA: Ia ua maea le lauga a Vaimauga, manuia le fonotaga.

FOFOGA FETALAI: Ia malo faafetai, leai e faapena ona faafofoga mai le atunuu, ia e leaga foi le soona fetaai o tatou saunoaga, aua o sailiili masei le saunoaga i totonu o le Palemene, o lona uiga ua taumafai le sui usufono e faauouo i le fetotoai ae o le mea lena a le tiapolo.

Ioe o Samoa e faapena e toe ma fai totoe si a tatou fonotaga, o lona uiga e iu i le matagofie i le finagalo o le Atua. O le mea la lea malo, malo le usufono.

Ia se i tulai mai le sui usufono o Salega i Sasae.

Tofa OLO FITI AFOA VAAI (Salega Sasae): Ia faafetai i lau Afioga i le Fofoga Fetalai, ua maua lo matou avanoa e tamuli atu ai lenei Tulafono.

Lau Afioga i le Fofoga Fetalai e le umi se matou faamatalaga, ae avea lenei taimi e momoli atu ai le faafetai tele a lenei itumalo i le Afioga i le Palemia, faapea foi le aiga Kapeneta, ma e uma lava o le paia o le atunuu sa fitaituga laina ma timuia ona o se faamoemoe e pei ona tulai mai, i lo tatou atunuu e ala i le faamai.

Lau Afioga i le Fofoga Fetalai ua maea tulei saunoa le Afioga i le Palemia, faapea foi ni isi o sui usufono i le tulaga foi o le tatou nutimomoia ma le faamafanafana atu foi i aiga ma matua e pei ona aafia foi i tulaga o le faamai ma le valaau a le Atua i alo ma fanau.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ae na ona matou faapea ane, ia maua pea e i tatou uma le lototetele aemaise lava i matua ma aiga. E i ai lava le tala foi lele, amuia foi nei fanau o le a toatele ni agelu i le malo paia o le Atua se i oo mai i lenei vaitaimi ua tatou i ai i lenei lalolagi.

Lau Afioga i le Fofoga Fetalai, e tele ni vaega o lo o matauina e lenei itumalo o lo o aumai manino e le Tulafono Tau Faaofi lenei. O le vaega muamua, o lea ua faatulafonoina ai matua i a latou matafaioi, ia mautinoa ua fai tui puipuia o a latou alo ma fanau.

O le lona lua lau Afioga i le Fofoga Fetalai, o lea ua ave foi le malosiaga i le Ofisa o Aoga ina ia talia na o fanau ua fai o latou tui puipui.

Ma le lona tolu, o lea ua tuu atu le malosiaga i le pule mamalu a alii ma faipule ma sui o nuu e atiae mai ai ni faiga faavae ina ia fesootai ma le Matagaluega o le Soifua Maloloina.

E matua lagolagoina e le itumalo lenei le Tulafono lau Afioga i le Fofoga Fetalai, ma e i ai le manatu o lo o i ai se atoaga i totonu o le Tulafono lenei. Ae na o ni nai tuualalo lava lau Afioga i le Fofoga Fetalai se i toe liuliu i ai le tofa ma le faautautaga a o tatou faagasolo le faamoemoe o le Tulafono lenei.

O le mea muamua lau Afioga i le Fofoga Fetalai, e ao lava ona matua faamanino mai se sao po o se malosiaga o le tatou Malo i le Tulafono lenei ia mautinoa le mulimulitaia e tagata uma. O le uiga o lau faamatalaga lau Afioga i le Fofoga Fetalai, o le Tulafono lenei i lau tilotilo atu i ai i sou lava lagona vaivai, e pei o lea ua tatou toe lafo i tagata le faatinoina o Tulafono. Silasila foi lau Afioga i le vaega lena o le Tulafono ua tatou faamalosi ai alii ma faipule po o sui o nuu e fai mai e latou pe atiae e latou ni faiga faavae e fesootai ai ma le Matagaluega o le Soifua Maloloina. O lona uiga lau Afioga i le Fofoga Fetalai, o la ua ave i ai le faitalia pe fai pe le faia, ae o i tonu lava lea tatou te tilotilo i ai i le taimi lea, ona sa tuu... pei sa tuu i tina a latou fanau e tui, e le i ano la i ai i le tulaga lea. O lea foi la ua ou toe tilotilo atu, o lea foi ua tuu atu i le pule mamalu a alii ma faipule, ae le o i ai se malosiaga a le Malo e matua faamalosi ai lava ia mulimuli ai i le tulaga lea....

FOFOGA FETALAI: Ua maua atu, se i tapa le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le mafai ona malamalama le sui usufono pe a le faitau i le atoaga o le Tulafono Tau Faaofi.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

A o le vaega lea ua agai tonu lava i fanau, ma o le mafuaaga lena o lea na aumai ai le teuteuga lea. Ma o le taunuuga o mea uma, o le taimi e aoga ai, ma o le malosi lena o lea ua faamalosi. A i ai se mea e misi mai tua a o lea e i i i le taimi e ulufale ai, se e le tau faamatala ia mea. Aua o le mea moni lava, afai e faataua e matua le aoga o fanau, ma o le mea lea o le anava lea a matua o i la e maua ai. Lau Afioga i le Fofoga Fetalai, o le mea e ala ai ona faaoga teuteuga o le Tulafono lea, leaga o lea foi e i ai le aia i le vaaiga o fanau, aemaise Komiti Tumama e i totonu o nuu ma le pulega a alii ma faipule. E malamalama i ai matou nei e le misia fono a nuu ona auai. A o matai la foi nei ma faipule e le o i ni nuu, e faapea ituaiga lauga e lauga ai, ona e le auai i fono a nuu. Ia o le fesoasoani atu lena.

FOFOGA FETALAI: Malo. Masalo ua maua mai le saunoaga faamalamalama a le Afioga i le Palemia.

Tofa OLO FITI AFOA VAAI: Maumau le Tulafono Faaofi le monomono ifo i ai o nai mea faapea. Ae le afaina. O le popolega o lou sui usufono lau Afioga i le Fofoga Fetalai, afai nei o lea ua tuu i alii ma faipule e fai mai a latou faiga faavae, e ono eseese uma faiga faavae a nuu. Ae a fai atu e le Malo le faiga faavae e tasi e laugatasia uma ai, ona faigofie foi lea o le galuega a le Matagaluega o le Soifua Maloloina.

O le isi la vaega lea ua tulai mai nei i i i mea ia o tamaiti aoga e le talia i ni aoga pe a faapea e le i tuia. Lau Afioga i le Fofoga Fetalai ma le mamalu o le Maota, e molimauina le tele o fanau e le o o lava i aoga, e tiga ona i ai le tatou Tulafono e faamalosi ai ma fanau i aoga, a o lea lava e tatou te matauina le tele o fanau e le o o i aoga. A faapea nei la o le a fai le tulaga lena e o atu ma tui puipui ma records e avatu ona faatoa aoga lea, e i ai matua lau Afioga i le Fofoga Fetalai ma le mamalu o le Maota e le ano i mea ia, e sili ai le o e faatau afitusi ma mea ia. Ia e pei o nai vaega na lau Afioga i le Fofoga Fetalai o lea e...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai lava se isi o tatou e le malamalama i mea ia. O lea e taumafai le Malo e faataoto matafaioi eseese e mafai ai ona faatino tulaga ia. E leai lava se isi o tatou e le o malamalama i na mea e te aumaia, e le fou. Ne i te i ua e faapea e le i oo i ai le mafaufauga o e tusi Tulafono.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Lau Afioga e le fou nei mea, ae a tuu i ituaiga manatu ia, e leai lava ma se mea e faia. A tuu i ituaiga faitioga ia, e le aoga le a, le aoga le a, le aoga le a. O lona uiga e maumau le Tulafono. O lona uiga, e leai lava ma se mea e faia.

FOFOGA FETALAI: Ia, se i fai silasila foi aua e le o i ai Tuivalea i le Kapeneta ma i latou o e sa amatamea ma avea ma maafaafuagalua i le faiga o le Tulafono. E pei lava foi ona silafia, e eseese uma lava mafaufau o tagata. E fiu lava e fai atu i le isi olomatua ae musu lava ia, e tai pei lava o le mea o le manu foi lea e fiu e ave i le vai e faainu ae le fia inu. E le inu lava. Ioe, e faapena. E tutusa uma lava tagata na fai e le Atua, ae tasi lava si ona eseese o le mafaufau, e alu ai le isi olomatua e tui lana tama ona o le alofa, ae faatalale lava le isi olomatua aua e le alofa. O lona eseese lona, ae soso mai i totonu. E leai, e mafua ona ou taumafai e tau faapupula le itu lea, leaga tasi lea vaega o le tiute o le Fofoga Fetalai, o le fesoasoani i le sui usufono mamalu i mea sa saunoa ma laga soo e isi sui usufono ua uma. Ioe, ou te le tuufaua la leaga o lona uiga e toe tuu foi le avanoa i le Malo e toe tulai mai ai, a o lea ou te manatu e faaauau le tatou galuega e tele tatou galuega ia e fia fai. Malie le sui usufono o le galuega a le Fofoga Fetalai lea e fai atu.

Ia tulai mai le sui usufono.

Tofa OLO FITI AFOA VAAI: Faafetai i lau Afioga i le Fofoga Fetalai, faafetai foi i lau Afioga e ona le Tulafono.

FOFOGA FETALAI: Ia, tulai mai le Minisita mo Tina ma Tamaitai, Atinae o Nuu ma Afioaga ma Agafesootai.

Afioga Hon Tuitama Talalelei Tuitama: Lau Afioga i le Fofoga Fetalai, ona o lea e aafia ai le Tulafono a lenei Matagaluega, na o sina fesoasoani mo le sui usufono, e le o au le pulega a le Malo i le faamalosia o alii ma faipule lea e ave i ai le fautuaga i lalo o latou faiganuu, ae o lo o i ai le malosiaga o le Malo o lea e auala atu i sui o le nuu ma sui tamaitai o le nuu, o le ala sui lea o le Tulafono o le Internal Affairs, ma le Tulafono o Tina ma Tamaitai, ina ia faamalosia sui tamaitai o nuu ma sui o nuu e latou te mataituina le vaega lea ma fesootai i le Soifua Maloloina ina ia fai ma faamalosia ina ia fai. Ma o lea foi o le a agai i ai le Matagaluega e faatino le auala e faatino ai le Tulafono lea pe a pasia le Tulafono. Ma le agaga faaaloalo.

FOFOGA FETALAI: Malo. Tulai mai le sui usufono.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Tofa OLO FITI AFOA VAAI: Faafetai i lau Afioga i le Fofoga Fetalai, faafetai foi mo le faauilavea a le Afioga i le Minisita mo Tina ma Tamaitai. Ia o le upu moni lava, o sui o nuu e i lalo o le pulega mamalu a alii ma faipule. O le mea lava lena lea na tulituli atu ai se malosiaga ma ni mea faapena i le pulega a alii ma faipule ma ia mautinoa ua toe faasolo a tatou Komiti Tumama foi nei sa leai ni tagata e feoti ai. O le mea la lena o lea e...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Masalo e le o maua mai e le sui usufono le faamalamalamaga. E sao o la e i lalo, a o le sui lena o le Malo. O le tele o mataupu ia e tulai mai nei i le va o nuu ma le tatou Malo, o le suiga o latou o sui o le nuu e le faia o latou tiute. E tele lava le tulaga lena e tulai mai o le savalia o le tatou Malo ona ua alu atu le faatonuga o le a sui le pulenuu, o le a sui le tina lea e le o faatinoina gaioiga a le tatou Malo e pei ona faufautua atu ai le Matagaluega. Ona sau loa lea o le savali a nuu, faamolemole o le a tuu pea le latou sui ae o mataupu ia e laga atu o le faapena ona soalaupule ma ave i ai le faataua. O i ina la e matua manino ai le taua tele o le galuega lea e fai e le sui o le Malo. O lea la e fai le fesootaiga, o le auala lea na ala ai ona faatulai mai sui nei o le Malo e saofafai i totonu o le nuu, e moni e pule ai le nuu, a o lea foi e oo atu i ai ma le leo o le Malo, aua e faaletonu loa sui loa. Ia o le suiga la lena, e matua savalia lava e oo mai lava ia te au e oo mai i ai savali, faamolemole o le a matou aloaia mea e fai atu ai le tuualalo a le sui o le Malo.

Lau Afioga i le Fofoga Fetalai, o i le ata leaga e le i Minisita le sui usufono nei, e le i malamalama i mea ia e fai.

FOFOGA FETALAI: Malo. E i ai le manatu... e i ai se isi mea o totoe lau Afioga i le sui usufono mamalu? Se taoto le vala lea e le faia i lau faamalamalamaga e fai i le faamalamalamaga a le Malo faamolemole le sui usufono mamalu.

Tofa OLO FITI AFOA VAAI: Leai na o se tuualalo lava, e manaia ae amatamea le tatou Matagaluega ia mautinoa ma lagolagoina e le pule mamalu a alii ma faipule se mea e aumai e le Matagaluega ona faigofie lea. O le isi foi mea i le tulaga lea e maua ai o tatou lape i le talanoaina o mataupu faapenei, ia na ona valuvalusia aa o le fau i lau Afioga i le Fofoga Fetalai, ona o le tele o taimi, e le tau i le loloto a tatou felafolafoaiga ma le faaaliga o manatu o Afioga i sui usufono i mataupu taua faapenei.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Malie lou finagalo aua le tetena i lou finagalo le tala, aua o le tele a o taimi e tulitamoe a tatou Fonotaga ona le maua atoa mai e lau Afioga finagalo faaalua o sui usufono. O le mea foi la lea i le mataupu lea e tulai mai i le Soifua Maloloina, e i ai a tatou lape, tatou te le i fesiligia uma nei mau mea i lenei taimi na tatou talatalanoa ai. E pei o le ala lenei e valuvalusia ai aa o le fau i lau Afioga ma tatalo atu, se i e alofa e tuu mai atoa avanoa se i faaali finagalo o sui usufono. Ma le agaga faaaloalo lau Afioga. Faafetai.

FOFOGA FETALAI: Se i ou fesoasoani atu i le itu lea. Ou te faamalulu atu i le sui usufono mamalu, atonu e faitauina le tulaga o lenei vaitau i taualumaga ma le faagasologa o a tatou galuega. Masalo pe na sauva foi i se saunoaga i futia ua sola i a tatou galuega fai. Amuia tatou o lea na alu le aso ananafi na amata i le 10 ananafi ae ta le 4 faatoa uma le tatou Pre-Sitting ananafi, ioe, aso atoa lava o tau faamalamalama e Ofisa Sili o Pulega le tatou Tulafono lenei. A o aso ia i lou faatoa sau o au, ioe, ia na ona table a i luma alu loa, o la e lauga le isi a o la e tau sue se avanoa e te faitau ai ina ia e malamalama i le Tulafono. Ioe. Ae amuia lenei vaitaimi o lea ua fai le aso atoa tatou te talanoa ai i le Tulafono. Ae ona o le tatou galuega, we are politicians. O lea tatou te iloa lelei lava, e taaalo i tua i le faafofoga mai tua. O le upu foi lele e tau tuu mai totonu finagalo ina ia faagasolo galuega a le Malo. O afea la e fai ai le mea lea, a o lenei e fai mai e pele ia outou? E pele ia outou le faalavelave lea e tupu ae toso i tua le galuega ma le Tulafono lea? Actions speaks louder than words. Ioe, ae le o le pla pla e faalogo mai tua. O tatou uma lava o polokiki, o lea ua ou fai atu sao lava. O le mea la lea, o lea e i ai le tatou Tulafono Tumau, a faasoese se taua o se mataupu e ni sui usufono se toatasi pe toalua pe toatolu, e le tuua i ai e le Fofoga Fetalai se mea. Aisea? E tiga taliga. O le tala sao lava vaeatu le paia o le Fono. Aua foi o le finauga lava lea e tasi o le a finau ai, ona toso ai lea o le Fono, toso galuega. E le faapena lou Fofoga Fetalai, e leai. Tatou o e faatino la tatou galuega, o la e faafofoga tapuai Samoa, ia vave ona maua se ai ae faagaoioi galuega. Ma ua maea foi i i le sui usufono na saunoa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi: Lau Afioga i le Fofoga Fetalai, e fai lava si matuia o le lafoga ia te au o le Taitai o le Maota lenei, o le upu lea tulitamoe. E le o tulitamoea a tatou galuega, e pau lava le mea lea sa ou matauina.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

O le avanoa tele lea sa avatu ananafi, o lea sa aso atoa o faatalanoa mataupu uma nei tau Tulafono, o Tulafono uma lava, na i ai uma lava Matagaluega. Sa i ai le Loia Sili, sa i ai latou nei o Ofisa Sili o Pulega o Matagaluega e faamatala auiliili Tulafono. E le aumaia la le le auai o le sui usufono, ona sau ai lea toe lagalaga mataupu ua uma ona lagalaga ma tali i totonu o Fonotaga lenei a le Palemene, e fai a o le i usu le Fonotaga aloaia i le tulaga e faamalamalama ai Tulafono. O le tele ia o le avanoa lea, o lea ua mafai ai ona soalaupule mataupu uma lava. O lona uiga a aumai se Tulafono iinei ae toe fesili se sui usufono. E i aila le agaga ese lea e faaalua i totonu i i. O le toso o le Fonotaga ma se i faalogologo mai tagata o toe laga mataupu ua uma ona faamalamalama, e i latou o Ofisa Sili o Pulega a Matagaluega. E masalo po o le lua lenei o Paeauga, o fai le faiga lea. O lona uiga, a tuu i le tulaga lena, o lea toeitiiti 10 tausaga o fai pea le faiga lenei. E le faapena o matou taimi faatoa o mai ai i totonu o le Palemene. O le taimi lava e taoto ai le Tulafono talanoa loa. E leai se taimi e faitau ai, o lona uiga la, e faatopetope lo matou faitauina o le Tulafono, ina ia o matou malamalama uma ai, ae talia le taimi e toe foi mai ai le Tulafono mai o, o lea ua auiliili e le Komiti. O si o matou avanoa la lena e toe lagalaga ai ni mataupu ua laaloa ai la matou matau, pe afai ua misi foi i le vaaiga a le Komiti.

Lau Afioga i le Fofoga Fetalai, e fai lava sina matuia o lafoga ia e aumai, e faapea ua tulitamoe le Tulafono. Lau Afioga i le Fofoga Fetalai, o lea ua e saunoa i le tulaga lena, ma ua ou toe tulai atu ina ia manino atili le vaipanoa lea.

Tofa OLO FITI AFOA VAAI: Lau Afioga i le Fofoga Fetalai, faamalulu atu, o le a foi se pati ua sala i lenei sui usufono, faamalulu atu o le tuusao atu lava o mea o lo o i ai ni lagona. Ae faamalulu atu i le Afioga i le Palemia, e le faia i tua mataupu a lo tatou atunuu, o le Maota lenei e lotea ai mataupu. Ae sa ou i ai foi i le Fonotaga ananafi, ae le i maua se avanoa ou te talanoa atu ai i le Tulafono. Na o iinei e fai ai mataupu a le atunuu e le faia i lalo o ulu, vaeatu le faafogafoga mai a Samoa.

Susuga Hon Tuiulaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega: Lau Afioga i le Fofoga Fetalai, e le o tua lea na fai ai mataupu ia.....se aua se...e te faaseseina le faafogafoga mai a le atunuu. E le o tua na fai ai, o le Fono Taualoa a le Palemene o sui usufono uma a le Palemene, ma tuu ai le taimi tele o le aufaigaluega a le Malo o Ofisa Sili o Pulega, ae o mai e faamatalatala ia te outou vaega o le tatou galuega.

17 TESEMA 2019**Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Lau Afioga i le Fofoga Fetalai, o le itu lena o lea ou te taumafai atu ae ou te vaai atu lava, e te le fia malamalama. Ma e le mafai foi ona matou nofonofa, matou te tutulai atu pea. O lea na ou maua sa e auai ananafi, afai la sa e auai ananafi ae leai se manatu na e faaalua ua e malamalama, o le a la le mea lea? O le faatautala, o le le mafaufau.

Tofa OLO FITI AFOA VAAI: Lau Afioga i le Fofoga Fetalai, se o le a ova lava le le mafaufau o le Afioga i le Palemia ma ana saunoaga. E le i maua sou avanoa ananafi o lea faatoa maua i totonu i i, ma e le o se Palemene le mea lea na tatou i ai ananafi. E faamalulu atu i lau Afioga. O le mea lea ua ou tulai atu ai, e pau lea o le mea e tau o le Palemene.

FOFOGA FETALAI: Ou te manatu foi ua fai si paopapa o le lafoga a le Nofoa. O le naunautaiga lava ina ia faagasolo le tatou galuega. Mo le silafia e au i le tauola au fo'i i le fagota. E i ai foi le taimi tou te oo mai ai i le Nofoa o le Fofoga Fetalai, e tasi lea tiute o le faagasolo o a tatou galuega. Aisea? Ina ia vave faatino. Silasila foi i Ofisa Sili o Pulega o Matagaluega ma Faalapotopotoga a le Malo. E le mafai ona tuuaunoaina le Fonotaga a le Palemene seiloga lava e uma a tatou Tulafono ma tatou Fonotaga ona faatoa afifio foi lea ma talaaa, e faatino galuega e atinae Samoa. E pei o itu ia o lea e tau foi i ai le vaai a le Nofoa aua e tasi lea vaega o galuega ma tiute o le Nofoa. Ma ou tefaamalulu atu foi, faamalie ma faamaualalo atu, afai ua paopapa, ia sola i nuu le aina ae faamagalo e le Atua le tulaga o le tatou galuega.

Tulai mai le sui usufono mo Anoamaa i Sisifo.

Tofa Hon Lauofo Fonotoe Nuafesili Pierre Lauofo (Anoamaa Sisifo): Faafetai i lau Afioga i le Fofoga Fetalai,

FOFOGA FETALAI: E toe pau lea o le sui usufono..

Tofa Hon LAUOFO FONOTOE NUAFESILI PIERRE LAUOFO: O le a faapuupuui foi, e tasi lava le mataupu e fia oo i ai se tautalaga, ona e nofo ma tomanatu i le aso ananafi, e pei e le i afea i le tatou faatalanoaga i le aso ananafi.

Ua matauina lava le tulaga o le lelei tapena o lenei Tulafono i lau lea vaai. E momoli atu ai le faafetai i le tofa ua ae i le Malo i le tulafono ua aumai. O lea e pei e foliga ua tapui vaega uma. O le Tulafono o aoga iamanaomia ia pepa fanau, o pepa tui ma isi manaoga ua aumai i le taimi e ae ai le tamaititi i le aoga. O lea ua saunoa faamalamalama foi le Palemia i lenei Tulafono.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ae ua ou tulai ona o le tulaga lea ou te fia agai i ai, faafetai ua aumai le Tulafono lea o Fono a nuu, Village Fono Act. Ma o lo o aumai foi i lalo i le faaupuga o le Tulafono, e tatau ona fai ni a latou faiga faavae o afioaga i totonu o le atunuu, ae fai fuafua la i manaoga ia o tui puipui o lo o aumai e le Soifua Maloloina. O lau talosaga i le tatou Matagaluega o le Soifua Maloloina, pe mafai ona fai ni kopi o manaoga ia, o requirements for immunization ma isi mau faamai eseese, ae tufatufa atu kopi i sui o le Malo po o pulenuu e ave i tua i nuu ma afioaga e silasila i ai, tufatufa atu i totonu o fono a nuu, i lou la talitonuga o a Faiga faavae o le a tuu faatasia ma fausia e fono a nuu, fai fuafua la i luga o manaoga a le Soifua Maloloina, faaoga ma taiala e fua i ai le fausiaina o a latou Faiga faavae.

Ma le lua o se manatu lau Afioga, o lalo o Tulafono lea o le Village Fono Act, Fono a Nuu. E i ai le manatu e lelei le faamalosia o afioaga e ave a latou Faiga faavae e lesitala i le Matagaluega o Fanua ma Suafa. Aua o lena e i ai aiaiga i lalo o le Tulafono lena, e mafai ona ave Faiga faavae a nuu po o latou lava Tulafono faanuu, e ave e lesitala i i, ona maua lea o le puipuiga o le Tulafono ma maua le malosiaga faale-tulafono a le Malo. O le tulaga lea, ona faapena lea ona faaoga i totonu o Fono a nuu, pe afai foi... po o ni faasalaga po o a mea faapena, ae le i taunuu mai i luma o le faamasinoga a le Malo, aua foi faasalaga faale-malo ia. Ua ou talanoa i le vaega lea, ona e agai lava lou mafaufau i le community based programme, o i ina lava le amataga. Aua o le taimi lena o lea e soifua mai tamaiti, alo ma fanau, o pepe. O i ina la e faatino ai le galuega lea. Faafetai o lea ua tuu le Tulafono ia tiute tauave i luga o sui o le Malo, e o e faagaoioi polokalame ia i totonu o nuu. Ma e taua le monitoring, e tatau lava ona fai ma asiasi pea, pe tai masina, tai lua masina ma fai le asiasiga i totonu o le nuu. Ia mautinoa ua tui uma tamaiti fou faapea tagata o la ua agai atu i totonu o nuu. Mo le silafia ua tele foi ina feoi tagata o le tatou atunuu. O isi ua o i Savaii i galuega, o Savaii ua malaga mai iinei. Ua o i nuu i tua, o nuu i tua ua o mai foi i le taulaga, e faapena, e tatau lava ona mataitu pea le tulaga o i latou nei ma le feoaiga.

Ae momoli atu le faafetai i le Matagaluega o le Soifua Maloloina ma le au galulue uma mo le galuega sa faatino. Aemaise le lua aso lea sa malolo ai le Malo, e momoli atu ai le faafetai, aua e le faigofie, faapea foi le aufaigaluega a le Malo, o i latou ia sa galulue i lea aso. E faaleo atu ai le faafetai a lenei itumalo i la outou galuega sa outou fitaituga ai. O lo o malupuipua lenei itumalo. O se faamatalaga lea lau Afioga i le Fofoga Fetalai, faafetai mo le avanoa.

FOFOGA FETALAI: Malo faafetai.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Afioga ALIIMALEMANU ALOFA TUUAU: Lau Afioga i le Fofoga Fetalai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e i ai nai mataupu ia na o se afa minute ou te tulai atu ou te tali atu ai faaiu.

FOFOGA FETALAI: Ae a pe a lafoia i le Malo, e aafia uma lava i saunoaga a le Malo ia mea o lo o manatu le sui usufono e fia tulai mai ai. Lealailepule o lea na tatou faatasi ananafi.

Tofa Lealailepule Rimoni Aiafi: O le taeao ese lenei taeao i le tatou Palemene, e le masani ai, leaga ua soua le gataifale. O i foi e iloa ai le tautai matapalapala i aso faapenei. O le mea lea e fia avatu ai se manatu ae e le o se manatu tele, ae afai ua finagalo lau afioga, ua see lou sa e le afaina. Leaga e aoga le faafofoga mai o Samoa, o aso faapenei e tutu faatasi taitai o Samoa, faataatiaese o tatou uiga ma o tatou lagona faale-tagata ae o mai tatou tutu faatasi e foia le faamai. Fai sou sao, fai sou sao ia Samoa, o lea la na fia avatu ai se manatu, leaga e taua le Tulafono aemaise lou itumalo o faafofoga mai. Ma oute le taalofa foi i tua o lena e te silafia lau afioga. Ae afai o lou finagalo e avatu se manatu se tasi, ae afai e leai, ia o le a malolo atu.

FOFOGA FETALAI: Malo faafetai le faaaloalo. Faafetai le lagolago i le Tulafono. Ia saga faamanuia le Atua i le sui usufono. Lafo atu ia i le Malo.

Afioga ALIIMALEMANU ALOFA TUUAU: Lau Afioga i le Fofoga Fetalai, se i fai se manatu o le itupa o tina. Maua sina minute se tasi. Faafetai, e vave lava, e lagolagoina le Tulafono, e pau lava lea o le mea sa matauina ua tatou lafoina uma i afioaga i pulega a alii ma faipule le matafaioi. Ae ou te talitonu lava au ia, i le district development plans lea e taitaifono ai faipule, o i ina tonu lava e ala atu ai lo tatou sao i totonu o le Tulafono lea i le faatinoina. Leaga o lea sa ou faatinoina i vaiaso atu ia ua tea, i le galulue faatasi ma sui o nuu e aumai faamaumauga o nuu taitasi o le itumalo. Ae galue le sui usufono e aumai faamaumauga o e na tui, e le gata o Primary Schools o Pre Schools, o tuiga sa o i tua i nuu ma falemai. O iina na faigofie ai na reconcile ma iloa le aofai o le nuu la e totoe.

*17 TESEMA 2019***Tulafono Tau Faaofi o le Teuteuga o le Tulafono o Tamaiti (Nu.2)
2019 – faitauga faalua**

Ua laga ai se leo e tatau foi ona faataua so tatou sao, o tatou o faipule faaoga le District Development Plans, lea e taitaifono ai tatou. Tatou te monitor ina ai le faatinoina o le Tulafono. Ma le faaaloalo lava faafetai.

FOFOGA FETALAI: Malo faafetai. Malie sui usufono o lo o nanau mai e fia saunoa, ae lafo ia i le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ou te momoli atu le faamalo sui usufono sa sausaunoa faatupu manatu foi i nisi o mataupu sa laga. O le mataupu muamua lau afioga, ina ua ou taua Matagaluega ia e soosoo tauau i le faatinoga o le faamoemoe. O lo o aiaia i lalo o le Tulafono, o latou uma nei, e fai fuafua i Faiga Faavae e faataoto mai e le Soifua Maloloina. O uiga ia faale-malo, o mataupu lava tau soifua maloloina, e faataoto mai lava e le Soifua Maloloina Faiga Faavae ona mulimulitui ai lea o le faatinoga e le Matagaluega po o tulaga foi i totonu o tulafono eseese a nuu o tina ma tamaitai, ma agai atu ai i Komiti Tumama ma i latou uma o le a faatinoina le pitolaau mo le tatou faamoemoe o le Tulafono Tau Faaofi lenei.

O le vaega lona lua lau Afioga, o le itu lea sa ou talanoa atu i le taeao e faamalamalama, e faapitoa lava le tautalaga i le tui lea o le misela, a o lea e leai se saunoaga na agai i le 16 o isi faamai e tatau ona fai tui puipuia. A o lea sa ou taua atu na o le tolu, e faapitoa lava i le gasegase lenei o le misela, o le rupela. O le rupela o le misela Siamani lea e mafua ai ona faaletonu le vaai pe tauaso foi le tamaitiiti, ma le mami lea ua tatou iloa uma lava, ae i ai ma le anoano o isi mai o tamaiti lea e i ai tatou tui puipuia. O lona uiga la, e faapitoa lava le mea lenei i le misela, a o lea la e aofia uma ai lava ma isi tui puipui e 10 ma ona tupu, lea e aofia ai le tulaga lea o mai ia e tai pei o le mai foi lea e faaupu e isi o le makake. E tele lava le mau mai o tamaiti lea e mamai ai, e aofia ai foi ma le niuonia lea e fai ma talau atu, o lea lava e faaauau. O le polokalame la lona, o le polokalame e faaauau. E le faapea o le a agai tasi i tui ia ona uma ai lea i ina. O le tui puipui e aofia ai pe a ma le 16 tui ae pau lava le mea lea e faataua lea sa agai i ai lau tautalaga, o le faamai tonu lava lea e lavea ai nei a tatou fanau.

17 TESEMA 2019**Tulafono Tau Faaofi o le Teuteuga o le Tulafono o Tamaiti (Nu.2)
2019 – iloiloga auiliili**

Ae e i ai la isi mai o la e faagasolo lava le tatou polokalame e le o taofia foi. Ma o le tulaga la lena ou te toe faatauaina le vaega lea sa taua foi e sui usufono, o mea nei e leai se tau, ae a e alu e ave lau tamaitiiti e fofo, e i ai le tau, aua e te le alu fua, e i ai lava le faaiuga o mea uma, e tataua lava ona totogi le fomai ia, le taulasea, ne i te i ua uma ane ua le malie le taulasea ona fai ane lea o nisi vai e atili ai ona mai le tamaitiiti.

Lau Afioga i le Fofoga Fetalai, o lau toe tulai atu lea i le mataupu lea ina ne i te i ua avea ma tulaga foi lea e laaloa ai le vaai a le tina i le na o le tolu lea, ae ua le toe alu ai e fai isi tui ia. E matua moomia lava isi tui ia e tataua ona fai ma le isi mea e i ai foi ni tui e faatino ae ono le aoga ona e i ai ni mafuaaga po o le mea ua sese le ankle o le tui, po o le mea ua mafanafana le tui ua see ese ma le malulu e tataua ona i ai, aemaise lava mea nei o tui faitele.

Lau Afioga i le Fofoga Fetalai, o le tulaga la lena e tataua ona silafia, leaga o le tatou Fonotaga lea e fai nei o lea e faasalalau faalauaitele. Ae faaiu atu ai lau Afioga ne i te i ua moomia ni nai minute se tolu e faaiu ai le tatou polokalame o lo o totoe, ou te faatu atu ai le lafo, *Ina ia faaauauina mataupu o lo o totoe ona faatoa tolopo ai lea o Taulumaga o le tatou Palemene.*

Ia o le lafo faatu lena lau Afioga ne i te i ua ova ma le ta o le 1:00 o lea ua ou vaai atu toetiiti lava ta le 1:00, pe toe lua minute o totoe ia kava ane ai i le lafo o lo o taua.

Na faamaonia le lafo.

Na faamaonia le lafo ma faitauina le Tulafono Tau Faaofi o Teuteuga o le Tulafono o Tamaiti (Nu.2) 2019 i lona faitauga faalua.

**TULAFONO TAU FAAOFI O TEUTEUGA O LE TULAFONO O
TAMAITI (NU.2) 2019 - iloiloga auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua faaofiina le fuaiupu 12A fou.

Faamaonia.

17 TESEMA 2019

**Tulafono Tau Faaofi o le Teuteuga o le Tulafono o Tamaiti (Nu.2)
2019 – iloiloga auiliili**

FUAIUPU 3: Ua teuteuina le Tulafono o Aoga 2009.

Faamaonia.

FUAIUPU 4: Ua teuteuina le Tulafono o Fono a Nuu 1990.

Faamaonia.

**FUAIUPU 5: Ua teuteuina le Tulafono o Mataupu tau Lotoifale
1995.**

Faamaonia.

**FUAIUPU 6: Ua teuteuina le Tulafono o le Matagaluega o
Mataupu tau Tina ma Tamaitai 1990.**

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Tulafono o Tamaiti (Nu.2) 2019.

Faamaonia.

*Na faagasolo le Tulafono Tau Faaofi o Teuteuga o le Tulafono o
Tamaiti (Nu.2) 2019 e aunoa ma se Teuteuga.*

17 TESEMA 2019**TULAFONO TAU FAAOFI O TEUTEUGA O LE TULAFONO O TAMAITI (NU.2) 2019 – faitauga faatolu**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tamaiti (Nu.2) 2019 i lona faitauga faatolu.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

TULAFONO TAU FAAOFI O TEUTEUGA O LE TULAFONO O LE PULEGA O TUPE A LE MALO 2019 – faitauga muamua

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Tupe a le Malo 2019 i lona faitauga muamua.*

Faaluaina e le Minisita mo Tupe Maua, Minisita mo Aoga, Taaloga ma Aganuu ma le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Pulega o Tupe a le Malo 2019 i lona faitauga muamua.

TULAFONO TAU FAAOFI O LE VAEGA O FAATOAGA MA FAIGAFAIVA 2019 – faitauga muamua

Tofa Hon LOPAO NATANIELU MUA (Minisita mo Faatoaga ma Faigafaiva): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Vaega o Faatoaga ma Faigafaiva 2019 i lona faitauga muamua.*

Faaluaina e le Minisita mo le Soifua Maloloina, Minisita mo Galuega, Felauaiga ma Atinae Eeseese ma le Minisita mo Tagata Tafafao Maimoa Mai Fafu.

17 TESEMA 2019**Tulafono Tau Faaofi o Teuteuga o le Tulafono o le Faafoga o Lafoga (Polokalame Faa-Eletoroni) 2019 – faitauga muamua**

Na faamaonia le lafo ma faitauina le Tulafono Tau Faaofi o le Vaega o Faatoaga ma Faigafaiva 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O LE FAAFOEGA O LAFOGA (POLOKALAME FAA-ELETORONI) 2019 – faitauga muamua

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoga o Lafoga (Polokalame Faa-Eletoroni) 2019 i lona faitauga muamua.*

Faaluaina e le Minisita o Tupe, Minisita mo le Soifua Maloloina ma le Minisita mo Faatoaga ma Faigafaiva.

Na faamaonia le lafo ma faitauina le Tulafono tau Faaofi o Teuteuga o le Tulafono o le Faafoga o Lafoga (Polokalame Faa-Eletoroni) 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O MALOSIAGA O LEOLEO 2019 – faitauga muamua

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau faaofi o Teuteuga o le Tulafono o Malosiaga o Leoleo 2019 i lona faitauga muamua.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Malosiaga o Leoleo 2019 i lona faitauga muamua.

17 TESEMA 2019**TULAFONO TAU FAAOFI O TEUTEUGA O LE TULAFONO O FESOOTAIGA 2019 – faitauga muamua**

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fesootaiga 2019 i lona faitauga muamua.*

Faaluaina e le Minisita mo Faamasinoga ma Pulega tau Faamasinoga ma le Minisita o Tupe.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fesootaiga 2019 i lona faitauga muamua.

TULAFONO TAU FAAOFI O TEUTEUGA ESEESE (KOMITI FAATINO O FAALAPOTOPOTOGA A LE MALO) 2019 – faitauga muamua

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai atu i lau Afioga i le Fofoga Fetalai. Ua ou tulai atu e faatu le lafo, *Ina ia faitauina nei le Tulafono tau Faaofi o Teuteuga Eseese (Komiti Faatino o Faalapotopotoga a le Malo) 2019 i lona faitauga muamua.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Tagata Tafafao Maimoa Mai Fafu.

Na faamaonia le lafo ma faitauina le Tulafono Tau Faaofi o Teuteuga Eseese (Komiti Faatino o Faalapotopotoga a le Malo) 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O MEATOTINO TAU LE ATAMAI 2019 – faitauga muamua

Afioga Hon LAUTAFI FIO SELAFI PURCELL: Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Meatotino Tau le Atamai 2019 i lona faitauga muamua.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Tagata Tafafao Maimoa Mai Fafu.

17 TESEMA 2019**Lafo mo le Tolopoina**

Na faamaonia le lafo ma faitauina le Tulafono Tau Faaofi o Teuteuga o le Tulafono o Meatotino Tau le Atamai 2019 i lona faitauga muamua.

FOFOGA FETALAI: Ma ou te tapa lau Afioga i le Taitai o le Malo mo se lafo aua le tolopoina o le tatou feau ma le galuega.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te tulai atu e faatu le lafo, *Ina ia tolopoina nei taualumaga a le Fono Aoao Faitulafono seia aulia le Aso Lua 21 o Ianuari 2020 i le itula e 9:00 i le taeao.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

FOFOGA FETALAI: Malo le galulue, malo le usufono, malo le faatoatoa malo foi le onosai, malo foi le faapalepale.

Ia momoli atu le faafetai ma le faamalo i lau Afioga i le Taitai o le Malo ma lau Kapeneta i lau Afioga i le Sui Palemia, ia aemaise o Minisita Lagolago, ia faapea foi Taitaifono ma Sui Usufono o Komiti i lea Itu o le Maota, lau Afioga i le Sui Fofoga Fetalai, aemaise foi Sui Usufono Sinia ma le aumatutua o le Palemene. Malo le faatoatoa i lenei aso.

Ia avea lenei avanoa e momoli atu ai le faamalo ma le agaga faafetai, avatu ai foi vaimalu i o outou finagalo, o le a foi se lafoga ua paopapa pe le taugamalie, sosopo tuaoi le tatou nonofo ai, se i vaeatu le faafofoga tapuai mai a Samoa, ia e i ai le manatu ia o tatou tau fai maua le agaga o le fefaamagaloai, o lea ua i o tatou faitotoa le Afio mai o le Pepe Fou, o le Pepe e osia le togiola, ina ia faapena ona tatou maua le agaga o le fefaamagaloai, ae tatou tiu i le latasi e tusa o le finagalo o le Atua o le fealofani.

O le mea la lea o le matou tala lena, ae ou te tapa lau Afioga i le Palemia, sau saunoaga, sou finagalo aua le faafofoga tapuai mai a le atunuu.

17 TESEMA 2019

SAUNOAGA A LE PALEMIA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ia faamalo atu i lau Afioga i le faatautaiina o le tatou fonotaga i lenei aso. O le fonotaga e tomua ai le talanoaina o Seleni Faaopoopo e faaauau ai le tatou polokalame o galuega faaauau a le tatou Malo e pei ona amatalia i le Tala Autu o le Tupe o lo o faagasolo ai nei tatou galuega seia paia le faaiuga o lenei Tausaga Faaletupe, i le faaiuga o le masina o Iuni o le Tausaga Faaletupe o lo o faagasoloina nei.

Ia faamalo foi i sui usufono e pei ona saunoa nei i a tatou Tulafono ua pasia nei, o Tulafono o le a lagolago tele i taumafaiga a lo tatou Malo ma le atunuu ina ia aua ne i toe aafia tatou i se faamai tele faapenei, e toatele ni isi o tatou e maliliu ai, e faapitoa lava i le misela.

E ui lava ina malolosi foi upu o le aso, ae o lea lava na saunoa se tasi o sui usufono sinia o le tatou Maota nei, sa saofai i le Nofoa o le Fofoga Fetalai e le mili faauuina a tatou upu. A oo loa ina o tatou talanoa, o tulaga na e atagia ai le tauave i le faamaoni o le tatou tautoga sa fai. E le mafai ona avea ia le tatou masani, i tulaga o masaniga sa fai, e oti ai i tua se taofi e tatau lava ona aumai i luma. O se fesoasoani ina ia agai ai i luma le tatou Tulafono ma agai ai foi i luma le soifua o le atunuu o lo o soifua i lalo o le Tulafono. E avatu ai le faamalo, o lea ou te mataituina le toatele o tatou o lo o auai sei vagana foi le toaitiiti o lo o tuatuagia, ona o tulaga le maalofia.

O le avanoa foi lea e avatu ai le tatou upu faamaise i le atunuu, ona o le tulaga o nei faamai pipisi ua tatou aafia ai. E i ai ia le saunoaga sa agiga i le tatou Maota nei, e pei e faasino i le tulaga o faamai ma le foafoaga a le Atua. O le tele lena o manatu o le aufai tofa i le Filosofia ia po o manatu faa-Tusi Paia, o le foafoaga a le Atua e aofia uma ai lava ia mea ia. E i ai le taimi e oo ai lava i siama o lea faatoa agiga ia faamai fou, ua leva lava ona foafoa e le Atua mai le amataga. Ae e i ai taimi e faatoa te i mai ai, o isi siama faatoa ola mai i le 2,000 degrees celsius, le malosi o le vevela, e faatoa ola mai ai isi siama ao isi siama e faatoa ola mai i le malosi o le malulu.

O uiga eseese ia o le matagofie po o le matautia foi o foafoaga a lo tatou Alii, o tatou mafauauga e le o le finagalo lea o le Atua. O le ala lena e feagai ai pea i tatou ma luitau o le soifuaga lenei, e le o ni a tatou aga, ae o aga na na faataoto mai i le amataga e o tatou uluai matua na agasala, ma faasolo mai ai mafatiaga o lo o feagai ma i tatou uma.

O le mea lea e faamalulu atu ai i le atunuu i le tulaga ma faamaise atu foi i ai latou e ana fanau ua maliliu. O lea ua taumafai lo tatou Malo, i se taumafaiga e ui ina tuai, a o se taumafaiga e puipuia ai i latou uma, i le agai atu i le taimi lenei i le lumanai, o le a toe aafia ona o tulaga e pei ona oo oo i ai finagalo faaalua o le Maota nei.

*17 TESEMA 2019***Saunoaga a le Palemia**

A o lea ua tatou agai atu i le vaiata o le Aso Faamanatu o le fanau mai o le Mesia, ma e ao foi ona avatu ai le faamalo i le tapuaiga a Samoa i ona tulaga faalupe, ao alofaiva lo tatou Palemene i ona tiute tauave. O le agaga atoa lena lau Afioga i le Fofoga Fetalai, ia maua e i tatou uma e le gata i le Maota lenei, ae faapena foi i le tapuaiga a Samoa aua le Usoga a Tumua ma Puleono i Salafai, faapea foi le tapuaiga a Aiga, Le Ao Mamalu o lo tatou Malo, Sui o le Fono a Sui Tofia, faapea foi le aufaitatalo, o lo o faanonomanu aua o tatou faiva o malo.

Ia maua e i tatou uma lava se Kirisimasi Fiafia ma se Tausaga Fou manuia. Ia soifua ma ia manuia tele lo tatou alo atu i aso fiafia o le Kerisimasi ma le Tausaga Fou.

FOFOGA FETALAI: Malo! Faafetai, ua ou manatu ua faafofoga Samoa, faafofoga foi le tapuaiga a le atunuu i le saunoaga i le Afioga i le Taitai o le Malo, faamaise ae faapea foi ona faalaeiau ma faamafanafana ona o le faalavelave ua tulai mai i lo tatou atunuu.

Ia e lagona lava le leo o le lototele, pe afai tatou te maua le agaga o le galulue faatasi. Ia e le gata o tatou o sui usufono, ae faapea foi le Pule mamalu a Alii ma Faipule, le itupa paia i tamaitai ma le pule galue foi a faletua ma tausi. Ia aemaise foi feoi o le Talalelei, i le aufaigaluega Paia a le Atua.

Ia tatou te galulue faatasi ina ia faapena ona vave tafiaesea lenei faamai, na faapena ona sauva i si o tatou atunuu, a o nei lava faiva alofilima, e pei ona alofaiva i ai le Malo, le Matagaluega o le Soifua Maloloina ma matata eseese o le Malo, ma Matagaluega Eseese ma Faalapotopotoga, e tatou te faamoemoe lava i le agalelei o le Atua ma lona malosia e faapena ona puipuia ma aveeseina ai lenei faamai sauva o lo o feagai ma le atunuu.

Ia e i ai le manatu o le a taoto i paga le saunoaga a le Palemia, a o faafofoga mai aiga, o aiga e tausi e le Palemene, ia faapea foi le paia o Tama ma Aiga, Aiga ma Tama o le Usoga a Tumua ma Pule, Itua ma Alataua, Aiga i le Tai ma le Vaa o Fonoti, o le tulaga lena o lo o mamalu ai le Palemene, ona o le faamalumaluga o le tapuaiga a Samoa.

Ia e i ai le manatu e le toloa i se finagalo se manatu o le Fofoga Fetalai le paia maua, ae ua ou manatu e faapuupuua foi le tatou mafutaga, ona sa o tatou alapo i le taeao ona o le tatou Fonotatalo. Ia ua ou manatu o le tapuaiga foi lena a Samoa, ona ou faapea lea e lelei ona vave fai se tatou malologa.

17 TESEMA 2019

Saunoaga a le Palemia

O Samoa ua uma ona tofi, e le tau atia se pa pe sii se matalalaga, o Samoa e tumau, e talatau Toga e talatofi le atunuu, i le Paia o Aiga o Tama ma Aiga faapea le faleupolu o tofiga ma le Usoga a Tumua ma Pule ona faapea lea, taoto ia i paga i Tiafau nei, le saunoaga a le Afioga i le Taitai o le Malo. Ae o le a ou faaiuina le tatou Fonotaga i se tatalo.

Na tolopo Taulumaga a le Fono Aoaofaitulafono i le itula e 1:20 i le afiafi seia aulia le itula e 9:00 i le taeao o le Aso Lua, 21 Ianuari 2020 e tusa ai ma Polokalame o Fonotaga a le Palemene 2019/2020.